

清容居士集 附札記

一〇



館書圖書  
中文書



清容居士集

附札記

(十)

J  
17.8

12073

袁 楠 撰

# 清容居士集卷第三十四

傳

## 徐師顏傳

徐君諱師顏。字子愚。遠祖天聖間。由太末徙新定。故所居里。以氏得名。曰徐開。君始生時。蓮出並蒂。父母器之。稍長。讀經史。心徹意領。年十七。授室。君白大人。當令兒從師外方。乃游三衢。習進士業。入宋太學。程試甲乙。表流輩。性儻急難。歲饑。日具釜鬻。滿庭廡。值父喪。慨曰。世俗飯僧爲冥福。吾當活餓者以報親。是歲就食者幾萬人。太守楊潮南書以勵旁邑。至元十四年。詔用兵入南。俘虜日繫馬尾。疲弱棄道上。春大疫。饑民旁午。君出粟募民。舁骼坎瘞。可醫食者。親撫視以活。遇一女子。扶曳蒼然。氣微屬。問之曰。吾三衢儒家女。命載以歸。稍長。俾爲士人妻。客方達。可館于君。死。已飭斂具。其子辭不能行。卽指某地葬焉。復嫁其孤女。事繼母至孝。一日。妻治紉澣。出微語。君聞之。自責不居內者幾月。母言亡是。叱妻具簪服拜堂下。始復初。外氏族黨嘗質田。歲久。君束券。母前願奉田以償。其承順率類此。始爲信州教授。首言于郡。復儒役七百人。署所居曰道悅。以奉母。會母思歸。卽解去。湖南缺提舉官。集賢章舉之。辭曰。母在不宜遠游。受湖州乃歸。秩滿。視資。當入縣佐。君言昔爲太學諸生。中繩墨。始得郡博士。博士古官。何縣佐爲。復授太平路教授。所至必先新學宮。嚴餼廩。安定胡先生墓。浮屠氏將夷圮之。君力復而致祀焉。在太平時。治丁

蘭王祥諸祠墓。於仁孝殆天性。待諸生穆如也。晚得末疾卒。時年七十有四。曾祖某。祖某。子男九人。觀先卒。頤爲族弟。仲龍後。良革爲長興州教授。益晉。萃復未仕。女二。方丙子時。游騎入人居。大索。二女爭死之。孫男二十人。女三。曾孫男女三人。所著有上饒集。吳興集。姑熟集。北游錄。凡十卷。大理卿陵陽牟公序其詩曰。事親若徐積。詩亦似之。其子革留京師。將歸。泣言于袁桷曰。先人力詩書。宦不充其德。遺行又泯。退弗表見。革等何以自樹。將乞銘于翰林學士廣平程公以表墓。子爲之傳。藏于家。其可乎。乃弗敢辭。

贊曰。周官以鄉三物教萬民。任恤之道。戰國而降。挾持以干冀。幾於靡矣。若徐君者。不翕翕以近名。禮以爲防。恬然孝謹。彌老益安。子孫滿門。歿猶有稱。旨哉。

蕭御史家傳

公諱泰登。字則平。姓蕭氏。遠祖由唐末遷長沙。占籍廬陵太和縣。代有吉士。曾祖諱逢辰。官至中大夫。當開慶間。以安撫使副守鄉。郡兵至。卒急。羣議撤近郊民居爲清野。大夫持議不下城守。兵去。里人德之。晚歲築宅一區。立田八百畝。聚其族以教。厚德衍裕。生德安府觀察支使諱安中。稱其先猷。蚤歲以亡。德安生中順。大夫瓊州安撫副使諱元永。玉雪矜謹。儻自榮。是生則平。方幼時。頭角嶄異。九歲入鄉校。治論語義。屬筆精警。稍長。忽自悟。儒以道得名。事物險易。當品節中理。齷齪翦翦無益也。弱冠試吏。調永豐丞。永豐多盜區。跡巢穴。僂之。丞以治稱。入京師。授湖南儒學副提舉。振直士氣。使治靡密者不敢撓。部使者

徐瑛奇之言可爲御史府屬會徐爲中丞。亟力言。遂僉廣東道提刑按察司事。廣東介絕嶺海。幽篁深水。蠻獠縱恣。郡吏私表裏。聲言獠不可治。白日剽劫子女財物。公贈遺良吏清謹者。皆避讓。郡縣多版授官。姦宄馴積莫問。使者循行擇善地。坐歲月卽去。至則躬歷所部。勅治與獠相根蒂及積貪濫者八十七人。皆罷之。減始興貢銀之半。疏其可宜行于臺者凡二十便事。廣東民由是知朝廷有犯賊律焉。初至廣時。謹言獠寇入境。亦欲以是嘗試。一坐大驚。徐曰。督盜守令職。署舍在是。卒有警。我輩何自卽上馬出境。軍將爭率兵以進。獠乃退。是歲至元二十八年。天子下議羣臣言按察官糜爛不任職。更名曰肅政廉訪司。遂以舊職解。後新使者及御史咸言肅按察治事纔二百日。所論按皆引直當法。不宜以舊官同罷。牘甫上。御史大夫書牘曰。須選用。元貞改元。成宗卽位。罷兵安南。釋陪臣陶子奇歸。命李衍爲禮部侍郎。奉詔往使之。遂拜兵部郎中。介其事。明年二月入安南。世子遣僞署官曰太尉迎詔。空首不至地。因問何得爾。僞太尉曰。國世子未至。不敢先。以黃蓋二。皂衣數十人。清路入館。世子髡首跣足。率從吏百餘人至館門前。問聖天子起居。卻立曰。主上新卽大位。二使者辱入敝境。道里勞遠。秋毫無所取。誠切感抃。敢昧死願聞明詔大意。侍郎曰。郎中前曰。昔乃先王先諸蠻款附。朝廷錄舊功。將錫宥于汝小邦。汝曷敢不祗畏。畏克敬。乃不墜厥命。或少縱自恣。天憲速罰弗敢道。宜肅恭盡事。世子錯愕唯唯。越三日。備仗奉綵輿。率朝服數十人。導詔從。褥道中行入其宮。世子後從。二使者授詔。世子拜伏讀詔。與稽顙曰。小臣不自意獲寬大如是。復命再拜。遂定慰賀。皇帝皇太后皇后表。賤貢物儀注。成禮乃還。道由思明。時思明帥言石。



西州、祿州皆本朝地。爲安南所侵。幾二百里。彼詭言山溪蠻阮盩。出沒不相統。虛文歲往來無益。至永平寨。寨故宋戍兵。遮道言實。安南部領侵撓。不得耕耨。回首語陶子奇。山溪蠻誠所屬。奚號令不可止。今已目覩。當語而世子。子奇不能對。至是復命歸地。蠻吏上下顧吝。遂言吾非以侵疆來。石西地不足輕重。設奉辭致討。汝何以自洗。各屏息一口。盡歸侵地。故右丞相太傅公時治湖廣省。聞復地。亟喜之。爲設宴以勞。凡安南所贈遺。悉返之。明年遷連州。又明年改爲江西儒學提舉。儒者用廢已久。新舊持短長。科舉律令。交排鄙不中節。至則擇知名士禮致之。導誘後生。斟酌可能行者。爲繩準。省檄慮囚。有巡官及富民殺人。誘傭奴以財。俾自誣伏。獄屢閱無異詞。徐跡處所及所持刃。亡有。獨引囚曰。若是汝當死。咸款實得出。會詔使按問諸道。守令治狀。使回。丞相問官吏孰廉。使以儒學官蕭泰登對。四年。僉嶺南廣西道廉訪司事。海南都元帥色徹肯。松年案舊作薛閣干聲燄震海上。多所爲姦利不法。立具章劾。有詔雜治抵罪。覈殺無罪七人。焚掠村堡二十四。奪私沒奴婢六百七十五。雜畜三千六百五十五。過柳州。出妖民誣誑者百三十七。凡黜吏二百一十。罷攝吏四十一。六年。進奉直大夫江南行臺監察御史。分守江浙行省。會歲大饑。吳流民扶曳滿道。已定議出官粟。守法吏言非朝旨。不得擅語。曰。民命在旦夕。後有詰責。已捐貲以償。何害爲。行省吏牘積糶叢雜。首尾銜絡。搖手莫敢問。時已得疾。呼掾史詰難。視罪輕重。悉坐之。又別爲副書筆其事。使後毋有出入。羣吏大驚。是歲八月。疾漸革。趣治棺斂。手書屬其子。語侍疾者。勿宜受贈賻。遂登舟。不復言。卒時年三十有八。歸葬于其鄉螺岡門外。配楊氏。繼彭氏。子男三。文孫。憲孫。昇孫。女三。大夫天性明。

爽閱具獄。率不爲吏蔽。探情傳意。多所出活。非曲假恩貸以自異。重然諾。容采精絢。達官大人。皆傾耳與論事。或言大剛必折。徐正色曰。今世士無有剛。果折何憂也。長子文孫。靜專自修。留京師。授翰林學士。程公銘俾爲家傳。念與公同年生。相後纔一月。藹薄不自振。然職在太史。筆削傳信。惟謹。乃弗辭。贊曰。大江以南。號多公卿。比數十年。闕焉無聞者何邪。官御史府。斬斬五六人。或以激毀。或以便譏。獨蕭公精謹自持。正靜益明。物莫能逃。守儒知通。据法不阿。使參錯天下。三年可成也。年不衍。用名益以昌。何恨焉。

### 史母程氏傳

嗚呼。余嘗得三卯錄讀之。蜀禍之慘。誠忍言也。夫朱禛孫之死而復生也。蜀民就死。率五十人爲一聚。以刀悉刺之。乃積其屍。至暮。疑不死。復刺之。禛孫屍積于下。暮刺者偶不及屍。血淋漓入禛孫口。夜半始蘇。匍匐入林薄。匿它所。後出蜀爲樞密使。嘗袒視人。未嘗不泣下。賀靖權成都。錄城中骸骨一百四十萬。城外者不計。嗚呼。推是考。蓋可悲也。蜀眉州史氏。由唐吏部侍郎儼。從僖宗幸蜀。因家焉。其先墓在青神。將二十世。宋世號名族。其出蜀也。今唯居湖州一房。讀其遺事。益悲之。史母程夫人。蘇文忠公之母之族也。夫人將攜其家下峽江。以橐金腰纏之。兵暴至。伏林莽。與鄰嫗謀曰。輸金果可生。吾兒無資。不復能出蜀。史宗誠無噍類矣。縱得生。旦夕兵復至。亦決死。均死。死以全史兒。誠不恨。嫗見身死。爲吾出腰中金。告兒。使速走。須臾。兵果執母。謝以實亡金。遂遇害。翼日。嫗語于鄰。告史氏兒。兒年甫十三。從草野得尸。如其言。

寤以歸。且函圖其象。識曰：史光母年五十有四。嘉熙二年十月二十有七日申時死。兵難。兒遂東南來。占籍湖州。刻意自奮。以右科爲浙東兵馬鈐轄。鈐轄生子圭文。嘉定儒學教授。嘉定生子台孫某。台孫儒術通吏文。復有子幾人。而史氏由嘉熙至于今。且四傳矣。噫。蜀由秦帝入中夏。至于宋凡一千五百餘年。文物大盛。絕不知有兵革。一旦掃削殆盡。迄今百餘年。遺墟敗棘。郡縣降廢幾半。可哀也已。可哀也已。贊曰：婦人內德不出門。房中歌廢。戰國而下。俱不幸以著。非得已也。諱莫甚於死。從容反復。烈士猶難之。况士女乎。歐陽公傳斷臂婦人。以愧馮道。夫人以死傳宗。承平世澤。於是乎見。作史者烏得廢諸。延祐七年十月壬子。前史官會稽袁桷撰。

孫孝子傳

表厥宅里。首於唐虞。若是則失其本心者。見於上古歟。司馬遷傳貨殖滑稽。或者譏其有激。五典爲治之本。捨正而求異。於世道何補焉。晉唐作史。始立孝友。勸勵後世。靡然嚮風。深有取焉。孫孝子楫。字濟川。世爲保定雄州新城人。幼儻。讀書通大義。其喪父也。遵禮而不瀆。後調宣德尹。慨然曰：吾惟母存。何仕爲。不踰月。謝去。事母以上壽終。而歸于田野者。凡十七年。兄蚤喪。奉嫂彌謹。卒爲兄子授室。姊贅李氏于家。三十年。將異居。營近市高燥。以奉姊。姊大慰喜。錄其孤有成。性重然諾。不自表襮。有故人喪。至日將葬。適以故不及送。抵暮促騎以往。夜已分。一家大驚。其待友也。有挂劍之義焉。其居鄉。隱約自持。鄉多宦家。絕不通問。鄉人咸曰：此孫孝子居也。卒上其行于朝。表其門閭。始爲燕南府史。錄事襄陽。繼授宣德。由宣德



名始著。調興和路經歷。改河東憲府屬。又調濟南。卒拜監察御史。今爲浙東道廉訪僉事。其行事不阿。多可紀。余獨著其孝行。於父母兄弟朋友兼盡。故特書。太原郭幹卿嘗曰。孫濟川少歲。能以其妻奩物償父兄逋。一難能。兄無子。買妾以奉。二難能。郭斬許可。今考其行。信然。前史官袁桷曰。曩在史院時。嘗纂次世祖以來功臣列傳。考實錄所著旌表令。尤諄切。至作隱逸孝行。訖未有章灼篤實。可以詔後世。若孫孝子。尤其人哉。

### 韓威敏公家傳

公諱政。字君用。姓韓氏。高祖諱天麟。知金臨潢府。有惠政。民祠奉之。卒葬城南。因家焉。曾祖諱垂。高州節度。妣李氏。祖文卿。知耀州。妣孫氏。貞祐避兵。南遷臨淄。今爲益都人。父松之。膂力善戰。四駙馬募兵。南征與之俱。至下邳。主將奇其勇。俾率益都兵戍山陽。戊子歲。攻宋揚州。歿于陣。公時年五歲。妣劉氏。挈以家山陽。明年。益都爲皇元所破。淮南城守爭遁去。劉氏走奔莒。居燧火山。劉母家沂州。其舅業醫。命習之。盡得其術。復遇一醫。由是益精。稍長。猶隱醫。以自活。山東連歲大擾。入于汴。復歸臨朐。又復還青社。時甫弱冠。見叔父順。始得拜淄州諸筮。乃復從軍。取海州。掠東海。破漣水。皆在功簿。松年案舊大王鎮遼東。召以公從。至于龍庭。與議事不合。卒以其嘗所計畫者。告于世祖皇帝。遂悉以邊陲大事委之。至元十三年。討西羌。姜衛松年案舊國王領兵。卽授嘉議大夫。漢軍元帥。監軍事。佩金虎符。軍中大驚曰。監軍非國姓。不得領。裕宗在東宮。心亦疑。會入辭。命以鎮庫弓挽之。轂而復引者三。始曰。大帝善任使。若是。賜金錦

衣一以行。西入大磧。斬馘凱聞。還軍至臨潢。得拜祖墓。其碑記猶在。十五年立五衛。首授前衛親軍副都元帥。指揮使。復兼領左右衛。屯田軍馬。紀律整遏。卒莫敢譁。奏以屯田各歸于衛。而治其無良者。則諸衛各有統屬。上從之。秋繕修大明殿。以治具稱。十九年加正議大夫。充樞密院判官。二十年進治書侍御史。二十三年改淮東道按察使。善決事。有拾遺者。告于其所失。輒誣以金。公遣拾遺者而叱去之。商人暴死于旅邸。疑邸人殺之。驗其嗜炙有毒。邸人得釋。其餘行事。往往與傳記相合。常出能吏。上薦士十三人。率致位通顯。在御史府。定議盧右丞牟利罪。卒流徙之。二十六年卒于官。年六十有六。葬于某鄉。贈嘉議大夫。口部尚書。上輕車都尉。南陽郡侯。諡威敏。娶孫氏。袁氏。石氏。殷氏。男八。拱。承務郎。廣州路增城縣尹。次振。搏。奉政大夫。慶元路昌國知州。拯。御藥院副使。次攜。皆蚤卒。次揆。扶持。女十人。孫男若干人。搏之治昌國也。興儒學。建三皇祠。嘗紀其美績。且命作家傳。讀其隧碑。襲慶趾燬。有自來矣。贊曰。貞祐兵興。中原士人無噍類。獨臨潢以遺愛祠葬茲土。三世牧守。至於曾孫。死事有光。威敏是承。北省臨潢。南保臨淄。難矣哉。政合古先。不茹不吐。子孫繩繩。宜哉。

有元開府儀同三司上卿輔成贊化保運玄教大宗師張公家傳

公諱留孫。字師漢。系出清河。東武城張氏。留侯良之裔孫。故爲司徒。敵弟協爲衛尉。生魏太山太守岱。自河內徙清河。七代孫彝徙魏州昌樂。爲後魏侍中。諡孝侯。子始均。復諡孝侯。孝侯生晏之。北齊兗州刺史。生度雄。爲隋陽城令。是生文瓘。相唐高宗。子潛。揚州刺史。揚州生齊。爲杭州刺史。始居江南。至公十五世。

今爲信州貴溪縣人。曾祖宏綱。集賢大學士。光祿大夫。柱國魏國公。諡安惠。祖粹夫。金紫光祿大夫。大司徒。上柱國魏國公。諡康穆。皆以公貴。贈父九德。太中大夫。同知江東道宣慰使司事。累贈開府儀同三司。大司徒。上柱國魏國公。諡文簡。公兄聞詩。學道龍虎山。見而慕之。遂服道士服。以漢天師所傳授。游江淮間。儀觀頎整。見者尊異。咸願受其說。有相者曰。當貴極人臣。而清奇絕俗。視陶弘景。葉法靜。殆將過之。世祖皇帝平江南。召嗣天師宗演。選公從行。北方地高寒。皆不樂居。中遂委任其事。門室清泊。處之晏如也。世祖祠幄殿。裕宗入侍。風雨卒至。召見于上。見其貌異常。士而奏對簡異。益器之。風雨隨止。遂賜廩給裘服。俾歲從北巡。上與昭睿順聖皇后駐日月山。后疾甚。召至。命愈其疾。若有神人獻夢于后。遂愈。上大喜。命爲上卿。鑄寶劍。鏤其文曰。大元賜張上卿。敕兩都各建崇真宮。朝夕從駕。日昃。命衛士提輿以歸。內侍強登輿。謝不受。卽步出禁門。十五年。加玄教宗師。授道教都提點。管領江北淮東淮西荆襄道教事。佩銀印。明年。奏復宮觀。令自別爲籍。有獻言者。道藏經多殺雜。宜焚去不錄。遂密啓裕宗。黃老書。漢帝遵守清淨。嘗以治天下。非臣敢私言。願殿下敷奏。後上大悟。召翰林集賢。議定上章祠祭等儀。注訖行于世。十七年。奉詔祠名山川。給驛馬五十。令訪遺逸以進。敕輔臣設宴崇真宮。復餞于國南門外。回朝。以所見聞刻于上。上悉用之。十八年七月。皇曾孫生。是爲武宗。上命擇嘉名以進。是歲分翰林集賢院爲兩。道教專掌集賢。始自公議。二十二年。仁宗生。復召命名。今二帝廟諱。雖用國語。皆以公名義釋之。二十五年。預議集賢院。賜七寶冠。金錦衣。玉珮。珠履。二十八年。丞相僧格松年案舊作桑哥敗。上欲相謬勒哲松年案舊作完澤下同。穆卜之。

得同人之豫。公曰：同人柔得位而應乎乾。豫利建侯。同人爲得位。豫爲建侯。彖傳之辭也。陛下所擬爲無疑。未幾拜諤勒哲公爲相。後卒受遺輔政。二十九年。開通惠河。上問果便利。對曰：漕爲國本。孰敢議非。是誠減民力。取實效。民必趨之。由是河役卒不爲民病。三十一年。上不豫。遣內侍諭隆福太后曰：張上卿朕舊臣。必能善事太子。太子由軍中歸。卽帝位。是爲成宗皇帝。成宗慕道家說。歲祀彌盛。在宥十半。歲輒祠上帝。侈甚。祕祝御名。皆上所自署。後有白鶴翔雲中。命詞臣敘紀。付史館。元貞元年。同知集賢院道教事。大德三年。加大宗師。別給銀印。視二品。上御便殿。命講南華經。七年。上京旱。兩京山西地震。復命祠祝。謝曰：祠祝實臣職。祭不欲數。地道主靜。厥罰惟陽。見於五行傳。災由人興。願應天以實。布德賑惠。臣敢稽首以請。上深領之。八年。上御玉德殿。賜玉冠爲壽。十年。制授上卿。十一年。興聖皇太后。自懷孟還宮。武宗卽位。加大真人。知集賢院事。至大二年。領集賢院。位大學士上。是歲再加特進。時仁宗在東宮。進講老子。自是入侍。必賜坐。皇慶元年。錫號輔成贊化。二年。命將作臣製玉。刻文曰：玄教大宗師。手授曰：以是傳教。俾永遠。延祐二年。羣臣侍嘉禧殿。上曰：先朝備陟降。持保無瑕。缺者孰在。咸未有對。上語曰：張上卿其人乎。衆唯唯。遂制授開府儀同三司。號加保運。四年。以七十特敕。設于其宮。伎部畢列。宰輔以下。咸奉壽。復命圖像。鎮崇真宮。賜璽文曰：皇帝之寶。命翰林學士承旨趙孟頫爲贊。兩宮傳賜。翌日入謝。俛奏曰：臣際遇累朝。惕惕顧念。罔有替。今年且衰。耄不去辱。聖世願歸老鄉里。卽死且不朽。上不允。七年。英宗皇帝卽位。遵累聖優褒禮。再降璽書。至治元年。益求去。十二月壬子。酌酒會弟子。少頃入寢室。脩靜端坐以化。斂之。

日顏色完好。舉體如蛻羽。兩宮震悼。賻贈有加。幸輔至于士類。咸曰福人逝矣。傾城耄稚。則曰善人亡矣。皆弔哭盡哀。及啓柩。木冰載路。觀者嗟愕。始從日月山。世祖卽命公爲天師。卻立以謝。曰。嗣天師漢張陵之裔。今居龍虎山。願正其傳。由自三十六代嗣師宗演。至于今。凡四傳。皆公所匡翊。美鬚長大。矍然冲退。不擇貴賤。傾下承接。奏告廣殿。音聲激鏞鐘。聞者凜竦。寶錫無虛歲。未嘗奉己。屢錫田園。以食其徒。當至元末歲。成宗新嗣位。時宰不快於御史臺。成宗是其言。讓責中丞崔公彧。崔懼。問策安在。曰。當見丞相。釋所以。遂與俱詣相府。相怒霽。又與同謁近臣。言御史臺世祖皇帝建立。專以懲姦。格勢尊。則綱紀明。削之則臺不能立矣。近臣大驚。入言于上。明日大宴大明殿。諭崔曰。臺爲朕耳目。朕曷不知。憂卿等不職。故告諭。宜勿懼。其盡心焉。朕行爲汝增重矣。崔頓首拜手謝。其彌縫國體。婉順若是。至於排解薦助。人不知所自。亦不肯自以爲功。絕口不言朝政。貴客至。爭短長。酒盡三爵。卽假寐。客去。禮復初。暨喪遠。州郡縣接祭。以俟。今葬某縣某鄉。祖師八人。皆贈真人。事在傳宗碑。今嗣玄教爲吳全節。授特進上卿。玄教宗師。崇文弘道玄德真人。以真人佩銀印者三人。夏文泳。江淮荆襄等處道教都提點。曰毛穎達。掌遁教事。曰王壽衍。領杭州開元宮。以真人制書命者三。曰余以誠。領鎮江路諸宮觀。曰孫益謙。領杭州佑聖觀。延祥觀。曰陳日新。承詔興聖宮。以璽書命者九。曰何恩榮。提點信州真慶宮。曰李奕芳。提點南嶽廟。兼衡山昭聖宮。壽寧宮。曰張嗣房。提點潭州嶽麓宮。曰薛廷鳳。舒致祥。張德隆。薛玄義。徐天麟。丁應松。皆奉兩宮崇真祠事。其它弟子三十有八。曰上官與齡。何斯可。彭齊年。薛起東。李世昌。陳彥倫。詹處敬。于有興。王景平。蔡仲

哲、彭堯臣、張汝翼、馮瑞京、祝永慶、蔡允中、張善式、董襲常、王國賓、曹載靜、余克剛、丁迪吉、張居遜、董宇定、王用亨、張顯良、徐守勤、彭一寧、劉若冲、彭師尹、張逢吉、趙有立、程某、施某、葉某、童某、倪某、上官某、李某、公兄弟榮祖、弟子熙祖，亦以公故入宿衛。榮祖爲邵武路同知，熙祖爲衢州路同知。泰定二年，今上召全節曰：玄教汝祖闢立，其爲朕祈永遂大祠于長春，復追贈某官。

前史官贊曰：世祖皇帝闔一海宇，蒐遺逸，選藝能，靡然踵來江南持政柄者，不一二人，卒不能善終，何哉？在御三十四年，命相幾二十餘人，或解罷，或斥逐，獨張公無少疵病，目覩成敗，至于五朝，難矣哉！蓋其行無迹，曲焉以全，得老氏之旨，五福斯備。前古鮮著，詩云：昭明有融，高朗令終。張公其近之。

拜珠松年案舊作住下並同元帥出使事實

至元二十九年，今浙東元帥拜珠公奉世祖旨，以行軍招安使從征爪哇。于時高王二將爲蠻兵所圍，公深入拔圍出之。元貞二年，奉成宗旨，使西域。哈贊王愛其才，以尙衣職行軍有戰功，賞金符金帶，因令其入見于成宗，復賜虎符。皇慶二年，仁宗以金印賜丞相孛羅，且俾往哈喇班第松年案舊作哈班第。王所議事，至中途，遇額森布哈松年案舊作也先不花。王疑有間，謀執以問，答曰：今上所遣，不過通歲時問禮，曷有他意？王左右曰：使者往來，皆言有啓邊生事形迹。汝此行，宜得要領，可實言，否則撈掠汝，亦必言。遂命跪大雪以問。且搜其衣中，無所有。公曰：王所問，實不知。且王從何所得是議？王曰：阿必實克松年案舊作阿必失哈下同。至是嘗言之。且曰：哈喇班第王，上近支也。吾等族屬，存與留不可知。後使者至，必有處分。今汝往，彼必生事，速吐情。



以告我。曰：王擁兵遮道，使者急求去，多詭辭以脫。阿必實克曷可信。左右曰：彼統軍九萬，寧肯不自愛惜。詐言以求脫，遂縛公兩手納諸股，擊之。乃曰：有璽書具在，使臣往來有後先。拜珠萬死實不知，取璽書視之。始曰：彼果無罪，遂奪其虎符及丞相金印，拘囚王所。延祐元年，王與兵內寇，復遣使召公至獵所，曰：我已入汝境土矣。公曰：兄弟之國，無內外，彼地亦王地。王往何所疑。王曰：親疎既分，覺隙已兆，勢不得不爾。公徐言：在昔太祖皇帝西征有訓，若曰：人不可以信讒，讒入則宗親乖離，宗親既離，則百姓他適。將貽笑於敵國。拜珠嘗聞在成宗時，先王有盟與滅國，開關塞以安百姓，今言猶未泯絕。使者掉舌生異，同令王致疑。拜珠等良不稱職，敢叩頭死罪以請。王解顏曰：吾欲遣汝詣上，通好何如。公謝不能，時有不內附者，梗於路，遂罷行。復以公往昔拘所未幾，王薨，延祐七年，弟怯別王立。王召曰：在昔先王嘗遣汝詣上前，後不果，汝今宜以素所具奏者以聞。是年秋入朝，上曰：太祖造邦孔艱，惟和好惇敘，則宗支允寧。汝其以元帥職名，乘驛諭朕意。王既受上旨，拊膺謝曰：疆宇寧敕自此始。汝來何遲也。對曰：使副有疾在道，故不得速進。王曰：來旨極善，使他人來，吾亦不若是深信。大較使臣多擅增減，致啓邊禍。公曰：拜珠來途中聆逃人言，且云復將有兵變。拜珠實不信，懼王惑其言，而行人之言不得信于上，是爲虛行。王宜執察善計慮，拜珠不敢他引古事爲比。維昔定宗皇帝征把禿王，有滅國真薛禪使者，諫罷征，嘗喻太祖得國之本，明配日月，量侔江海，合天地之大德，故能混一海宇。滅國真薛禪死已久，拜珠不才，願踵其策以獻。後王從公言，奏于上，訖如約。以平王遂遣使收兵四境，而少尼其行。且曰：邏者猝遇，將害汝，遂設宴三日，給符信。

護行。俾歸于朝。至治元年三月。抵上京。入見于上。而王亦遣使奏拜珠兩爲行人。不愛其身。隆爵厚職。所不吝。然除拜非吾所預。爲語朝廷大臣。善奏於上。使得享至樂。建牙纛。爲諸侯表得矣。是年冬。丞相拜珠入奏嘉禧殿。具以功簿言。乃拜中奉大夫浙東道宣慰使都元帥。官旣滿。類集行事。俾梅爲奉使事實。云前史官袁桷曰。太祖皇帝經畫區夏。以磐石宗。犬牙於龍興絕域之地。四履奠安。盛矣。夫疆域旣廣。詔旨上意。傳諭失實。則時致疑爭。拜珠公間關險阻。百懼不撓。義正功倍。以數百語解百萬之師。非精白一心。曷底于是。計勳上多。卒稱其職。俾後之爲人臣者。益有勸焉。

# 清容居士集卷第三十五

## 內制

### 昭憲元聖皇后諡冊文

德合乾元。母儀正而宸極立。道參泰治。王化基而國本寧。靖思保佑之功。宜慎欽崇之典。有嚴耐禮。爰重尊名。欽惟太皇太后陛下。淵靜體仁。齊莊秉度。憂勤潛邸。清謚治朝。內教治乎宮庭。懿範著于海寓。實生二聖。光于前聞。用貽沖人。纂茲丕緒。方將樂怡愉以承至養。率恭儉以挹太和。痛變輿之莫旋。儼珠衣之如在。謹遣某官奉玉冊玉寶。上尊諡曰昭憲元聖皇后。伏惟靈承顯冊。陟配宗祧。錫羨家邦。永延祚胤。

### 英宗皇帝諡冊文

瑤圖續緒。神已御於鼎湖。玉冊揚休。禮宜陞於太室。悼降年之不永。儼立政以如新。爰述徽猷。以傳信史。欽惟皇帝陛下。文明天縱。剛健日嚴。辨姦邪於嗣位之初。彤廷祇畏。廣儀注於治朝之際。清廟肅雝。絕封敕以杜儉人。申憲章以勵多士。罰茲無赦。令必惟行。君臨三載而有成。知周萬物而莫隱。豈運逢艱否。大命靡終。然號謹追崇。尊名是著。謹遣某官奉玉冊玉寶。上尊諡曰睿聖文孝皇帝。廟號英宗。伏惟炳靈有赫。歆格無違。耐于新宮。以妥以宜。

### 皇后冊文

皇帝若曰。在昔正始之道。必先內治。予以奉承宗祧。化成天下。朕嗣大曆服。祇循憲章。宜資配助。用彰位號。咨爾皇后。淑慎柔嘉。遵道是行。輔佐王邸。謙抑自持。實生元子。國本斯建。興龍舊鎮。介子紹封。粵若臨御之初。贊畫計慮。厥相維多。正位中宮。天神協祥。今遣某官。授爾玉冊寶章。坤順承天。人道攸則。表正母儀。萬方是觀。惟躬儉節用。則徽音是嗣。惟求賢審官。則私謁靡干。匡朕德格。朕心實爲有賴。詩書所稱。罔專美于前代。噫。敬厥初。終有慶。尙其念哉。以膺爾景命。

特命右丞相詔

帝王之職。在論一相。予以表正百司。綱領庶績。朕纂承丕緒。勵精求治。然而澤有所未洽。政有所未舉。豈委任之道有遺缺。與。今特命中書左丞相拜珠。松年案舊作拜住爲開府儀同三司。上柱國錄軍國重事。中書右丞相。監修國史。一新機務。使邪正異途。海寓乂康。以復中統至元之治。所有便民條畫。具列于後。云云於戲。朝廷既正。著端本澄源之功。風俗斯醇。廣摩義漸仁之化。咨爾有衆。體予至懷。

戒飭曲阜廟學詔

郡縣廟學。崇奉之制。所從來尙矣。乃者大臣言曲阜廟學。剋建聿新。將嚴飭以風厲四方。朕甚慕之。惟夫子之道。行于天下。崇教立化。實始於魯。可不知其所自與。有司其益加明潔。屏遊觀。嚴汎掃。以稱創立之美。敬而勿褻。神明之道也。苟完以教。夫子之訓也。其盡心焉。毋怠。

閣阜山萬壽崇真宮加大崇真萬壽宮詔

朕慨慕希夷。式瞻殊勝。蜿蜒磅礴之所。茲神必靈。虛靜恬愜之徒。其用彌廣。瞻彼仙翁之化境。曰惟江右之名區。歷年茲多。嗣教不墜。形而下者謂之地。茲實景山神而明之存乎人。載加美號。承天之。大與國無疆。

試進士策問

延祐五年三月六日進

制曰。蓋聞昔之聖人。垂衣裳以成無爲之治。稽於書傳。任賢設教。品節備具。諄諄然命之矣。是無爲者。始於有爲也。事久則弊。唐虞之世。歷年滋多。不聞其有弊也。治莫重於定國體。尊國勢。綱常之分嚴。風俗之化一。國體定矣。善惡之類明。賞罰之制宜。國勢尊矣。廉遠堂高。上下之辨也。量才授官。莫得踰越。國之大柄也。若是者。其道何以臻此。記曰。禮樂刑政。四達而不悖。王道備矣。夫禮以防民。樂以和志。刑以禁暴。政以善俗。四者何所先也。夙夜浚明。卿大夫之德也。知其邪隱。則知所以儆之。知其困窮。則知所以振之。爲吏習常。恬不知省。其故何也。繼體守文。善論治者。尤以爲難。朕承累聖之丕緒。宵旰圖治。罔敢暇豫。於變時雍。若有缺然者。子大夫觀乎會通。酌古今之宜。毋迂言高論。以稱詳延之美。朕將有攷焉。

試進士策問

泰定元年三月六日進

制曰。朕聞自昔聖王之治天下。罔不在初政。故舜之嗣位也。明目達聰。命九官。咨十有二牧。禮樂刑政之道。粲然備具。禹成厥功。祇承于帝。精一執中。實聖聖傳心之要。湯黜夏命。以克綏厥猷。爲本。武王勝殷。首訪于箕子。天人之際明矣。詩之訪落。公劉書之無逸。立政亦惟成王。嗣服之始。君臣交修。以成繼志述事。

之業。唐虞三代其授一也。維我世祖皇帝。聖神啟運。時則有同心同德之彥。效謀輸忠。故能混一區宇。治化旁洽。朕祇承丕緒。永惟帝王事功。見於經傳。悉遵而行之。時有古今。制宜損益。若稽世祖之宏規遠略。垂統萬世。夙夜寅畏。以圖治安。然人才之列於庶位者。猶若未及。治道之達于庶政者。猶若未備。子大夫其以前王之坦然明白。可行於今者何策。世祖政典之綱領。當今未盡舉行者何事。宜悉心以對。以輔朕惟新之治。

先農祝文

仲春令月。原陸勸耕。祇率舊彝。以陳明祀。惟茲艱食。稼政允修。相其陰陽。迄獲豐庶。

司嗇祝文

春土方興。曰耘曰耔。聿修耕籍。庸薦常事。維神功協先農。種斂是司。除菑布祉。以成善歲。

太歲祝文

年熟於酉。曷敢震驚。儼功在初。率循其舊。爰立寢宇。匪曰廣居。尙訖相成。以祈寧謐。

后土祝文

至哉坤元。以靜爲主。匠石踰年。寧免震疊。寢宇畢治。庸復其初。敢伸揭虔。克相終事。

五方帝祝文

五行之用。相須以成。維神司之。萬物以靈。相彼土宇。撓神實多。引誠致祈。勿謹勿訶。



立皇太子告太廟祝文

列聖延洪。纂嗣大曆。國本聿嚴。太后有訓。親王大臣。僉言允同。曰嫡曰長。茲惟主器。將建册命。首告于宗廟。

西鎮祝文

地道靜專。載物惟職。震竦失恆。咎徵莫測。側身內修。秉德若惕。慎其政刑。爰別淑慝。乃戒輔臣。香册昭格。顧復故常。以底寧謐。

司天臺祭告祝文

太陽

煌煌大明。浴光咸池。丕冒八表。出震見離。揆時朱明。中街御輪。體乾以行。庶物駢臻。法茲照臨。實予一人。爰絜芬祀。庸遂民因。

太歲

歲行歸終。福祿是惇。四時秉權。百神攸遵。禮有報祈。德用兆民。時將平分。雨暘協宜。綏此金穰。物無癘疵。

太衝本命

卯爲春門。品物彙滋。受命自天。集茲蕃禧。聿嚴省方。高明謹時。大德曰生。繫震是出。順陰養陽。罔敢暇逸。肅迎元本。多祐有秩。

勝先

轉火之宮。司南秉陽。時維長養。品物用章。繫月之恆。儷日以光。茲實命元。受福無疆。芳薦式陳。堯篚錫祥。

金星

金精呈輝。配日後先。遇伏斯晦。厥用不偏。清商助威。睽睽導前。爰庸預祈。以相坤寧。吉蠲匪瀆。戩穀是膺。

火星

執法麗天。俯承太陽。日茲羸縮。厥有故常。飭德省躬。導迎景光。陽居大夏。翼翼靡違。順軌合躔。德馨是祈。

土星

昭哉填星。德隆倭遲。燁燁中黃。百穀阜滋。斟酌元氣。導迎丕基。照臨元命。肅將以祈。嘉薦苾芬。留俞靡違。

氐宿

蒼龍首東。茲維宿殿。界于卯辰。靡有忒僭。象緯或凌。曰有成憲。彼不順行。曷敢適從。虔命宗祝。監茲寅恭。

房宿

巡狩事嚴。百司靡寧。率彼徒御。興言宵征。天星之精。實爲準繩。凌伏愆常。推策布程。蘭席令芳。祇迎展誠。

心宿

布政于宮。上稽明堂。維茲日永。法天以行。五緯疾遲。渾象森著。謂數實然。嗣服彌懼。祝冊致詞。式筵菲具。

尾宿

析木天津。燕都所次。維昔初基。相攸塗墍。民用不頗。益遐以治。靈臺考古。庸啓震悸。善言維從。式致芬祀。

迎神

天佑丕基。一誠肅將。瞻仰昊穹。紫微騰光。龍虎森衛。鸞皇鏗鏘。降茲瑤壇。八音開張。碧雲紆徐。彤纓斯臚。

送神

靈旂歆願。靡亟靡遲。敬天之休。億載維期。三垣潤明。五曜逶迤。玉斗宣光。瑤壇受釐。愴兮如存。脫兮若遺。

楠木殿上梁祝文

揆時夏季。維土居中。百堵皆作。震疊是恐。百日以成。帝令攸式。棟隆之初。以底元吉。

崇真萬壽宮設醮齋文

序推良月。式符坤厚之光。誠揭層霄。虔致泰元之祝。竹宮汛潔。藁笈宣揚。伏願神御。顧臨靈旂。昭格玉衡。齊政永綏。有道之長。寶籙延年。誕啓無疆之壽。三宮悅豫。四海乂安。

青詞

天佑丕基。肇啓乾元之始。令行吉月。於昭坤德之祥。寅畏在初。籲尊惟重。伏願監觀有赫。敷錫無疆。懷德維寧。溥羣生而康乂。以慈爲寶。遂億載之怡愉。

皇帝本命長春宮祈福齋文

獻歲肇春。懋對亨嘉之序。祈天永命。式隕元本之辰。矯首層霄。延真殊館。伏願祥開泰治。道合乾剛。綏萬

邦而致豐年。咸躋仁壽。錫五福而建皇極。迄底雍熙。

青詞

陽和肇歲。宜與物以皆春。元本建履。敢自天而申命。額尊爲大。祇翼若初。伏願帝鑒不違。神功溥運。成四時之玉燭。允協昇平。展億載之瑤圖。恪依覆燾。

昊天上帝青詞

皇極建中。密運生成之造。玄穹垂象。益嚴寅畏之誠。禮謹祈禳。功深保佑。伏願靈旂下令。景緯順躔。發政施仁。迓丕基之永固。側身修行。迎嗣歲之嘉祥。

崇真萬壽宮設醮齋文

歲慎省方。爰恪遵於祖訓。秋嚴報禮。庸祇奉於玄科。演繹瓊章。敷陳瑤席。伏願靈旂昭假。叶氣周流。玉燭常調。遂家給人足之願。黃圖永固。致兵寢稱措之風。

青詞

嗣守丕基。心靡違於寅畏。導迎繁祉。歲恪謹於修崇。維德在秋。自天申命。伏願祥雲開瑞。景曜宣光。怡愉永康。受介福於王母。清寧無斁。錫皇極於庶民。

皇太后爲皇太子祈福設醮齋文

天威不遠。好生洽于民心。帝訓孔昭。受祉施于孫子。誠深保佑。禮盡禱祈。伏願馳馭肅臨。雲輿駢集。鴻圖

鞏謐允諧載物之功。燕翼綿宏。永保貽謀之吉。

青詞

正位宅中。恪守成於祖武。承天順則。庸徼福以孫謀。矯首叢霄。傾誠璇極。伏願玉衡齊政。金篋賜齡。重輪重暉。誕保無疆之慶。有嚴有翼。永恢長治之規。

長春宮散壇青詞

祈報聿嚴。儼神光之下顧。精誠允格。荷帝命之密符。弗祿攸宜。際蟠均慶。伏願歲成玉燭。政叶瓊衡。孔蓋繽紛。歸三千之寶所。瑤壇馥郁。拱百二之皇圖。

興聖宮上梁文

旭日蒼龍。聳帝京之積翠。層霄彩鳳。流阿閣之霏煙。巍成少廣之居。盛極東朝之禮。欽惟殿下。道師清淨。性合儉慈。色石補天。法女媧之妙用。瑤池錫宴。符王母之長生。穆如薰風之自南。粲若衆星之拱北。陛下孝嚴溫清。敬謹膳羞。謂神游泰初。當廣鬱儀之宇。而養以天下。益新長樂之宮。庶民子來。百堵皆作。倚空繡柱。峩峩太乙之揚旌。鬪角雕檐。奕奕飛廉之奏舞。彩宇周遭於禁雉。寶華流曳於駉鸞。匠石繕完。著龜告吉。舉修梁於地上。川嶽無譁。成巨構於城中。雲霞得色。敢伸善頌。庸贊昌辰。

拋梁東。天雞初唱日輪紅。漢殿瓊卮稱萬壽。堯階寶扇擁重瞳。  
拋梁西。三素雲扶鳳輦低。閬苑碧桃開已種。廣寒靈藥不須攜。

拋梁南。薰風殿閣聳眈眈。一色花光濃似酒。十分松露滴如藍。  
拋梁北。帝子天孫來侍側。何須玉檢告昇平。擬把瑤編增鏤刻。  
拋梁上。仙藥輕調承露掌。龍圖載見贊無爲。魚夢維占歌有象。  
拋梁下。女史未須夸鄧馬。聖德重歌韓愈詩。徽音願續周王雅。  
伏願上梁之後。坤元光大。鼎命延弘。雲需湛露之恩。德廣陽春之澤。松茂柏悅。三宮同億載之歡。鳳散雨  
濡。九有順四時之序。與天齊壽。率土歸仁。

皇太后寢殿上梁文

璇宮擁翠。刻姑射之層山。柏寢通雲。儼廣寒之寶所。疑神清淨。協德順承。皇太后養備東朝。尊臨北極。天  
純佑命。握四時而品物亨。夕以安身。御六氣而陰陽理。寶典深調於玉燭。珠星連緯於紫躔。陛下禮謹家  
人。孝行天下。謂榮觀合老氏之要道。而廣居乃亞聖之至言。令月書春。惠風司律。瑤池湧地。龜吐瑞以成  
形。畫棟騰雲。燕銜文而獻秀。髣髴十二樓之縹緲。開億萬載之怡愉。工師肅給以無譁。多士懽呼而稱慶。修  
梁舉地。率土皆春。敢集歌謠。庸伸贊祝。

拋梁東。髣髴神君下壽宮。絳闕雲光催曉日。翠簾花影颺春風。

拋梁西。靈杵玄霜煉紫泥。露下陰知金掌溼。參橫坐見玉繩低。

拋梁南。咫尺天居接蔚藍。底用麻姑擘麟脯。共看帝子引鸞騶。



拋梁北。色石神功參太極。物無疵癘樂豐年。道合希夷超至德。  
拋梁上。紫微鈞陳肅玄象。五兵不試太平年。三聖重光天下養。  
拋梁下。內宴傳歡慶朝野。遊魚漸識柳邊舟。飛鳥時隨花外馬。  
伏願上梁之後。乾清坤謐。月穆星俞。擊壤而歌阜康。結繩以復淳厚。千萬年永清於四表。九五福悉萃于三宮。

楠木殿上梁文

天道不言而庶類亨。式嚴居所。聖人無爲而天下治。爰法當陽。坐朝知問道之勤。側席審思賢之念。授辰考室。申令鳩工。欽惟陛下。守位建中。施仁濟衆。陋竹宮之侈靡。羞桂館之虛無。宣室受釐。未遑鬼神之間。石渠論奏。是資經術之明。掄榷楠以擬棟梁。審律度以合規矩。爰居爰處。乃寢乃興。歌庶民之子來。形四方之風動。虹梁歡舉。龜墨告從。敢述輿情。庸伸善頌。

拋梁東。一朵紅雲泰嶽峯。絳闕翠旌浮曙色。玉階星弁整朝容。  
拋梁西。王母傳宣曼壽齊。漏下銅壺催蜜炬。庭傳丹詔擁金泥。  
拋梁南。薰風殿閣靜潭潭。帝子承顏催鶴駕。宗王侍宴擁龍驂。  
拋梁北。紫微熒煌儼宸極。五兵奏凱一車書。萬國來朝合圭璧。  
拋梁上。玉燭金瓊契玄象。陽剛深法泰元尊。至孝力窮天下養。

拋梁下。百穀芄芄滿原野。淳風再使比羲黃。雅樂重宣繼嚳夏。  
伏願上梁之後。乾坤合德。日月順行。高拱稔清。景化溥霑於八表。茂迎穰簡。嘉祥均被於三宮。率土歸仁。  
與天齊壽。

普慶寺後殿上梁文

積翠凌空。儼諸天之層構。側金布地。成四梵之妙緣。惟我皇帝陛下。味道圓明。宅心清淨。深植善本。靈山之付囑未忘。廣種福田。寶所之莊嚴彌免。像設參前而山立。威儀殿後以雲趨。一一青蓮。層層貝葉。爰以棲神而凝睇。亦云澄觀以集思。成祇樹園。作平等觀。虹梁將舉。龍象具瞻。

拋梁東。瞿曇瑞世日輪紅。一手指天呈實際。九句談妙演宗風。

拋梁西。雪山深處鵲巢低。白足赤髭隨地見。紺眉青眼倚巖棲。

拋梁南。要看彌勒與同龕。擊竹莫參朝九九。拈鎚且問後三三。

拋梁北。大地山河光的的。平齊斗柄布王春。深拱宵衣開壽域。

拋梁上。堯仁如天高蕩蕩。八風不動太平年。四時平分眞實相。

拋梁下。川后山君擁風馬。赤麟白雁奏郊丘。瑞麥嘉禾徧原野。

伏願上梁之後。後天不老。景緯齊光。玉檢七十二君。同觀三脊。金輪萬八千歲。其拂銖衣。四海永清。三宮均慶。

天慶寺佛殿上梁文

寶構凌空。稱華嚴之富貴。青蓮湧地。成祇樹之神通。雪堂老禪。心匠虛明。性宗真淨。住南城數十載。名滿江湖。祝北闕億萬年。日嚴香火。雖紺宇禪局之已敝。而璇題祕殿之未雄。靈山之法會。如新舖辰之綸音。已下無踵而至。不日以成。繡囊結飛霞。稱由旬之龍象。金波麗鳩鵲。儼第一之人天。爰舉修梁。敢陳口號。

拋梁東。須彌初見日輪紅。願上吾皇千萬壽。銖衣拂石宴春風。

拋梁西。一朵紅雲映日低。不用親遊天竺國。只今寶所總菩提。

拋梁南。軒窗面面是瞿曇。欲問拈花微笑意。雪堂老子睡方酣。

拋梁北。殿角罍罍如翠織。鐘魚解作梵王音。日把心香祝宸極。

拋梁上。大雄之尊壽無量。聖朝方是太平初。白馬迎經踵三藏。

拋梁下。禪板蒲團不須假。側金布地擬諸天。香鉢如雲坐長夏。

伏願上梁之後。乾坤泰治。日月恆新。豐年調玉燭之和。正法拱金湯之固。兩宮萬壽。四海一家。

天壽節致語

洪範九五福曰壽。允屬至人。上古八千歲爲秋。實名治世。仰天門之蔥鬱。審雲闕之青圓。黃道日明。式紀老人之次。金莖露肅。有開上聖之祥。慶浹叢霄。歡騰穀旦。恭惟皇帝陛下。穆清居位。剛健體元。雷在地中。消羣陰於旣長。風行水上。示景命於方來。辟雍建崇化之規。象魏布新民之法。以食爲本。歸漕粟於中都。

所寶惟賢。卻貢琛於絕域。方且端冕以聽古樂。惡酒而好善言。麴蘖相臣。簫勺多士。瞻鳳皇來儀之瑞。歌  
鳧鷖守成之詩。克叶禹謨。丕光周道。某等伎陳九奏。曲合三呼。蘭有秀。菊有芳。願敷宣於律呂。月重輪。星  
重曜。行登載於歌謠。遙望天威。敢陳口號。

羲和御日上蓬瀛。盛旦瞳瞳集壽星。冠珮雲排朝帝闕。笙鏞春響藹宸庭。瑤池已獻蟠桃實。玉殿初開五  
葉莫。要識吾皇清淨理。長生瓊液養脩齡。

# 清容居士集卷第三十六

## 外制

翰林學士承旨榮祿大夫知制誥兼修國史遙授平章政事閔復贈光祿大夫大司徒上柱國追封永

### 國公諡文康

聲音與政通。辭莫先於風雅。易簡而理得。治實效於乾坤。維昔先皇。歷選羣彥。一道德以垂統。嚴誥命以興文。奉璋孔戩。執簡有度。攷諸遺老。號稱名臣。具官某。學博而智周。材新而意古。山立陽休之儀表。望重縉紳。日光玉潔之詞華。才工黼黻。進揆臣而堅國。是避政柄以守儒榮。畫旨尙方。密勿深符於上意。澄清外服。咨諏慎考於民風。人物著編。典章衡石。遽告休而還里。終辭徵以養年。脫屣如歸。逝川滋遠。噫。德與制詔。早已類於人間。居易詩文。今果傳於身後。載加褒恤。式克欽承。可。

### 妻李氏贈永國夫人

魯侯燕喜之歌。褒其令美。敬仲皇飛之下。後將蕃昌。事不偶然。理難固必。具官某。妻某氏。韞玉養德。佩蘭襲芳。規矩不出於廳屏。律呂永諧於琴瑟。守大家之戒。靜慎而禮法自防。誦季女之詩。恪恭而祭祀有度。命之不淑。報也宜豐。噫。茅土竝封。亦旣慰文儒之願。玄堂同穴。尙欽承人世之榮。可。

翰林學士承旨榮祿大夫知制誥兼修國史劉廣贈三代

曾祖深贈昭文館大學士資德大夫追封邢國公諡康穆加上護軍

泰山之雲起膚寸而成雨黃鍾之律累銖黍以立均德胚胎於前人釋膏沐于後嗣具官某曾祖某持身圭璧篤學巾箱清白儒科曩共誇於鄉黨丹青帝制今復見於階庭念昔干戈攘擾之艱唯汝詩書種殖之懿既開公社載廣王勳噫天勝人人勝天事果成於昭代子有孫孫有子慶永萃於一門增秩便藩疏恩冥漠可

祖肅中書左三部尙書商議中書省事致仕贈推忠贊治功臣金紫光祿大夫大司徒追封邢國公

諡文獻加贈上柱國

乾坤清夷真主昇而四海一風雲際會英傑出而庶績凝篤生股肱之臣能總喉舌之職亶惟熙運爰立鴻勳具官某祖某學博而通方才長而守正讀易悟損益之理觀文參忠質之宜中歲投閒卒起裘度於既老平居緩獄審知定國之將與廟堂咨國是於耆龜朝野係民瞻於柱石家聲允似子承曳履之榮書種有傳孫擅掌綸之美用永厥世以等其功噫四世三公亦既推赫奕之懿一門萬石尙毋忘孝謹之思可

祖母鄭氏贈邢國夫人

王臣外勞勳資邦媛冢婦中饋訓立闔儀具官某祖母某氏佐餽靖共持家澹素縑緗整比齊襟拱立於北堂錡釜絜獨斂衽儼趨於南澗子先仕顯孫復文榮噫沃壤再疏足示龍光之赫奕芳猷未遠尙瞻象



服之委蛇。爰詔後人。式共爾位。可。

父愨中奉大夫護軍彭城郡公加榮祿大夫大司徒柱國封邢國公

帝堯雍熙。擊壤之民鼓腹。漢文寬厚。扶杖之叟。厖眉念累。聖之仁恩。俾遺老之壽俊。具官某。父某。脫棄軒冕。徜徉里閭。誦讀詩書。逸矣師承之舊。陟降籩豆。優然孺慕之思。壯年幹蠱。以裕如。晚節搢謙。而泰定。言追古往。毫及意新。種樹養生。默合三槐之故事。巾車訪俗。有符五柳之曠懷。亨嘉真礪水之師。朝著仰商山之皓。兒年希有。世號少儔。噫。周公拜前。益慎威儀之則。韓侯受命。毋忘樞僕之恭。可。

母彭城郡太夫人李氏追封邢國夫人

貴子而不及親。施仁宜厚。揚名以之爲孝。報德是先。禮有追崇。恩推錫賚。具官某。母。身同隱遯。性一柔嘉。蘋藻恪共於春秋。絲麻力勤於夙夜。執喪慟絕。竟三日而始蘇。佐餽權違。遽中年而長往。是生賢嗣。爰顯清朝。噫。翠輅魚軒。亦旣極小君之寵。蜜章鸞誥。尙再疏下泉之思。可。

妻冀氏彭城郡夫人追贈邢國夫人

月圓而魄虧。理或可詰。劍成而神化。物莫能推。念茲偕老之盟言。詎意中道而淪世。具官某。妻。秉芳蘭。葢佩矩珩。瑣奉舅姑。以無違。處娣姒。而彌度。年之不淑。生也有涯。噫。鄉國大邦。追錫永光於窀穸。泉臺佳氣。周流宜見於烹蒿。可。

妻廖氏封邢國夫人

相夫之道。靜淑是師。承祀之儀。絜獨惟謹。故貴得以從其爵。而教必先修其身。具官某妻。執禮奉盈。守德珮玉。事舅嚴雞鳴之問。逮下審桃天之宜。噫。小君實諸侯之妻。惟謙抑可以長保。鉅鹿乃邢子之國。惟儉素足以久安。毋替戒詞。以底終吉。可。

集賢侍讀學士中奉大夫李侗贈祖父二代

祖懋河東。宣撫檢察使。贈嘉議大夫。吏部尚書。上輕車都尉。追封冀寧郡侯。諡文惠。乾坤轉旋。臣擇君而審事。風塵膠鞮。民後以求生。匪資談辯之折衝。曷得從容而完聚。昔有俊士。聞于當年。具官某祖懋。沈鷺決機。秋毫析理。不背時而棄利。魯連感燕將之風。能因危以爲功。陳康歸蕭王之智。按堵復鄉閭之舊。開田廣井邑之繁。全逃民山寺之中。沒猶有祀。憐故帥孤城之守。許以自新。謂宜騰仕之軒飛。乃獨急流而高避。菟裘嘯傲。合難兄難弟之權。犢車雍容。追某水某丘之勝。才不大用。德遺後人。噫。維此冀方。存憂深思遠之旨。嗟爾孫子。篤尊祖貴始之誠。賜履舊邦。克昌允嗣。可。

祖母張氏贈冀寧郡夫人

婦人內訓愈久。則事莫可稽。聖朝鴻恩雖遠。而澤益加厚。錫類者教民之本。顯親者繼志之基。具官某祖母張氏。語簡以嚴。心靜而正。斂容似玉。家庭服其母儀。釘坐如山。鄉閭師其懿德。益昌爾後。克底于成。噫。貽厥子孫。不負窀穸之願。烝畀祖妣。爰疏湯沐之封。營魂有知。寵光無數。可。

祖母某氏贈冀寧郡夫人

孝治天下。教必本於興仁。惠及萬方。禮莫嚴於尊祖。爰念瀛洲之彥。庸推下泉之恩。具官某祖母某氏。韜玉無瑕。服蘭有度。采藻行潦。離離承祀之顏。殷靈南山。黽黽勸夫之義。生子允才而不淑。傳孫濟美而始昌。噫。一門同封。聿廣聖朝之澤。三晉故壤。足爲里社之榮。垂世彌光。終古奚憾。可。

父昱成都路防城軍民總管贈集賢侍講學士追封冀寧郡公

古潤長松。宜棟梁而弗施於太室。韞匱美玉。器瑚璉而莫致於合宮。維先朝宣力之臣。皆一時成德之彥。才不究用。沒猶可稱。具官某父昱。沈思而好文。敏斷而濟事。地生天施。知民悅以阜通。城高池深。審人和而環守。蜀爲望郡。職號劇曹。足食足兵。流馬相迎於道上。爲物爲變。飛鳧疑度於雲中。天不以年。子由之貴。噫。三牲之養。榮親弗逮於膝前。兩谷之間。錫土有光於身後。式嚴嘉命。爰慰九泉。可。

母仇氏贈冀寧郡夫人

曾參風木之悲。深嗟于身後。孟宗冬筍之養。得遂於生前。事爲至難。道無全美。具官某母仇氏。遵行儉素。服習勤勞。不見其夫之榮。舜華隕露。猶幸有子之似。蘭茁承春。肆衍褒嘉。同疏追錫。噫。金葩錦蕤。益增玄宅之光。丹穀文軒。允過板輿之樂。清朝展慶。故里聚觀。可。

母韓氏贈冀寧郡夫人

孟軻五鼎之饋。禮非有踰。子路三釜之悲。情何可旣。仕獲通貴者常有。祿不逮養者何多。具官某母韓氏。家法儉勤。母儀慈惠。化治絲枲。生兒承臚仕之傳。恪共蘋蘩。奉祀守吉蠲之度。蠶封已拱。口澤猶存。肆推

錫類之仁。誕布昭天之渥。噫。黃河一曲千里。茲實故鄉。白雲孤飛太行。有光前闕。烝嘗不墜。喪亂如新。可。

妻許氏封冀寧郡夫人

君子偕老之宜。國風所詠。家人中饋之吉。易象攸存。作則闔儀。來嬪瀛彥。具官某妻許氏。有諧琴瑟。相夫之道無違。不出廳屏。教子之心彌切。維靜以正。既樂且康。噫。蟋蟀唐都。合儉禮而民始化。采蘋南潤。循法度而祀乃修。遵錫舊封。祇承景命。可。

集賢大學士榮祿大夫致仕李謙贈光祿大夫柱國追封魯國公諡文正

祚衍皇圖。上聖聿開其正統。教興文治。鴻儒允際於清朝。四時周而寒暑成。八音宣而律呂比。道關運數。天篤忠純。具官某。藻思夙新。蜚聲壯著。處身閭里。蔚然黃流之在中。策名搢紳。燁矣錦衣之尙綱。早贊青宮之善。迄編金匱之書。疏傳十事之簡嚴。志遂四休之安佚。碑板華夏。辭累貫珠。詩篇林泉。語深挾纊。故老倚之爲衡石。諸生仰之如蒼龜。大帶幅巾。儼君實之在洛。秀眉明目。伴康成之居鄉。既得壽以保終。宜易名而廣譽。土荒東魯。爵列上公。噫。孔門設科。先德行而後文學。漢廷取士。首孝弟而次賢良。舉世實難。唯卿無愧。可。

妻孫氏追封魯國夫人

夷攷儒學之彥。允資賢淑之妻。從游外方。米帛不干其念慮。敦敍同姓。籩豆式謹其威儀。古有其人。今見于汝。具官某妻某氏。溫恭秉度。禮制飭躬。相敬如賓。皓首不墜其繩墨。有嚴教子。青燈猶課以詩書。惟小。

君之封用加矧大賢之忠宜錄爰伸竝命以慰九原噫起家而居有之惜未配夫宗之貴告往而知來者庶永爲婦德之規於昭營魂寔對天寵可

禮部尙書中奉大夫元明善贈二代

祖海贈嘉議大夫祕書監太卿上輕車都尉追封清河郡侯諡貞惠

青桐孫枝之良雲和所植紫芝靈根之秀商山是宜隱顯之用有時報施之效不忒具官某祖某養真巖壑策名里閭試吏緩刑卒應高門之語抱孫奇骨可勝執硯之悲器卓犖以不羣量汪洋而莫測李翱之傳皇祖文已四馳王通之述府君事關百世禮嚴教孝爵侈勸忠噫東壁圖書爾尙詔後人之似故鄉湯沐益毋忘昭代之恩可

祖母高氏追封清河郡夫人

珠藏九淵神光燭而愈闕蘭生空谷幽香耿而自持通塞維時存歿奚憾具官某祖母高氏慶源演迤淑則和平種桑而望繭絲亦云勞止樹桐而中琴瑟夫豈偶然錫類者治世之湛恩尊祖者孝孫之美志噫爵書故里永爲粉社之榮稱曰小君益表松阡之觀可

父貢奉議大夫驍騎尉大名縣子贈中奉大夫吏部尙書護軍追封清河郡公諡孝靖

種德如藝木必閱世而始昌保身若奉盈惟持善者無愧窮達有命幽明不渝具官某父某孝友篤躬質直守道簞食卒安於簿領籟金始羨於縑緡不假以年益豐其報孝能繼志鬱成南陽之阡文以顯親行

擬瀧岡之表。肆加錫爵。復舉易名。噫。丹詔疏恩。天官實古之冢宰。蜜章分土。甘陵維爾之舊邦。尙其營魂。歆此殊命可。

母弭氏大名縣太君贈清河郡夫人

孟軻大儒。深藉斷機之訓。仲由至孝。每懷列鼎之悲。審閭範之可遵。感堂封之彌遠。具官某母弭氏。孝慈有度。淑慎無違。禮行於家。蘋蘩循沼。泚之素。教施於子。斧藻爲朝廷之光。已錫鴻恩。爰加再命。噫。九原可作。鸞書啓鄉郡之尊。八座竝榮。象服稱小君之號。可。

妻李氏大名縣君封清河郡夫人

鵲巢起家之因。實原勤儉。燕喜受祉之美。斯爲樂康。報之原者。始必勞持之素者。終不懈。具官某妻李氏。習熟女史。幽閒內儀。儼服笄珈。執沖謙而彌下。恪恭蓬豆。盡蠲絜以無隳。百祿是適。再命而偃噫。相其君子。益知典禮之寅。稱曰夫人。毋忘主饋之訓。可。

光祿大夫湖廣等處行中書省左丞相阿爾哈雅松年案舊作阿力海雅追封太師郡王

四懸設樂。必假鏞鍾之洪音。八柱承天。斯合明堂之巨構。乾坤啓運。川嶽降靈。是生非常之偉人。以佐統一之眞主。沒且不朽。德猶可稱。具官某。勇略致身。英姿蓋世。羊祜平吳之策。誰復先之。楊素渡江而來。何其神也。據荊州以爲之根本。擣長沙以披其腹心。兵勢建瓴。皇威震電。先皇帝知人而善任。定功以行封。倬彼雲漢之章。廷無儔匹。享有金石之奏。位班侯王。兼將相之重權。契君臣之嘉會。令肅風生於細柳。政

成人指其甘棠。念着定爾功。實有資於贊助。而大資於廟。必申錫以褒崇。彌深撫綽之思。莫遂圖形之想。白雲已往。青史如新。噫。齊岱爲鏐。石城爲鋒。朕已悉皇王之大武。黃河如帶。泰山如礪。卿允爲邦國之元勳。詔爾後人。無替先德。可。

妻某氏贈國夫人

鵲巢起家。因以爲召南之首。殷靈勸義。足以成大夫之行。矧江漢之舊邦。昭柱石之偉績。必資內助。以佐高賢。具官某妻某氏。澹泊無華。靜專有守。良玉在匱。襲中美以善藏。幽蘭生林。愛國香而自闕。稟北庭之渾厚。婉南澗之恪共。方考禮以報功。爰推恩而錫類。噫。西平有子。足彰闡範之光。魯侯令妻。宜受國封之侈。是惟崇德。尙克歆榮。可。

太尉平章政事某特授太子太傅

朝廷大策。慶莫盛於建儲。社稷重臣。禮尤嚴於敬故。功參羽翼。政倚股肱。具官某。秉志精忠。宣猷倬實。黃閣調元之始。允屬謀謨。青宮選士之初。必先德義。惟左右前後之人。正斯君臣父子之道。彰噫。日重輪。月重光。宜益資於輔導。書同文。車同軌。期咸底於昇平。往暨乃心。祇若予訓。可。

遙授平章政事某特封秦國公

竄惟龍飛之初。考圖數貢。爰篤鷹揚之舊。崇德報功。出命告廷。分封啓宇。具官某。蚤乘熙運。躬受真才。絕北威名。允著長城之助。居中韜略。密宣前箸之籌。肆予纂承。委以輔弼。噫。干戈弓矢。于以昭武功。山川土



田斯以彰異渥。祇服明命。益殫嘉猷。可。

中書左丞某封贈三代

曾祖某贈資善大夫中書右丞追封高昌郡公諡康懿

粵昔高昌肇邦。藏經史以崇儒師。立校官以訓子弟。所從來久矣。故其聰明才知。通於聲音文字之學。代不乏人。具官某曾祖某。誦詩讀書。漸仁摩誼。得於鄉里之素。若雲在淵。勃然以升。蓄極而通。至曾玄而始見。疏封舊寓。以報流澤之無窮。尙其享哉。可。

曾祖母追封高昌郡夫人

諸侯之制。立廟以五。親服未盡。是猶有待於後也。今爾曾孫某。勤勞王家。錫之山川土田。而汝與封。推其自則。由玄孫啓之。先王之旨遠矣。具官某曾祖母某。蓄德不耀。保躬益貞。敷佑後人。輔弼不懈。曾孫之慶。至于五世其昌矣。今從夫爵。尙承朕恩。可。

祖某贈榮祿大夫平章政事追封齊國公諡莊靖

赫赫在上。永遵繩武之思。子子爲孫。爰述尊祖之義。發揚潛德。追錫愍章。具官某祖某。明珠媚淵。良玉韞匱。言寡尤。行寡悔。祿不願干。旋中矩折。中規動無踰。則養真於攘擾之際。味道於沖漠之初。本碩枝繁。源深流遠。噫。稽尙父之返葬。咸謂分封。仰周公之拜前。允宜淑後。載嘉正直。庸受寵綬。可。

祖母追封齊國夫人

蘭長空林。羞當戶以自獻。珠生巨海。懼媚川而深藏。矧爲隱約之時。曷表殊絕之行。婦德永闕。孫賢可推。具官某祖母某。孝敬行於家門。肅離傳於閭里。念昔日艱難之際。爲善是持。至歷年磅礴之多。興宗有驗。恩分沐邑。賚廣脂田。噫。綺繡冰紈。莫慰生前之願。文軒象服。足爲身後之榮。可。

父某贈銀青榮祿大夫大司徒追封齊國公諡恭惠

大明麗天。羣陰伏于葭室。寸雲出岫。甘澍徧于寰區。崇德報功之典存。繼世象賢之制著。惟勳是錄。于禰有光。具官某父某。潛珍養名。砥節礪行。王明受福。井潔不食。非所憂。父教爲忠。蠶金之藏。奚足羨。事久斯定。時至乃亨。念爾嗣之弘文。生聞孫而佐治。蟬聯朝著。磐折里閭。維積善之粹精。宜流澤之溥博。詢于集議。庸爾展恩。噫。泱泱大風。知紹封而益茂。謙謙終吉。詔承德以靡虧。可。

母追封齊國夫人

積行累功。允賴夫人之配。承先共祭。載歌季女之賢。剛柔之道有恆。倫紀之位斯定。具官某母某氏。持守貞白。衣被潔清。子又生孫。莫計堆牀之笏。善必有慶。久高容駟之門。議勳以褒。盡臣。錫命而及。賢配。亶惟異數。足稱營魂。噫。三服齊官。是在昔女工之訓。五鼎廟食。亦庶幾孝祀之芬。旌寵有光。敬承無斁。可。

榮祿大夫宣政院使領延慶使某贈推誠佐理功臣太師開府儀同三司上柱國追封齊國公諡文

忠

式觀景運。灼考蓋臣。際乾坤清夷之時。承風雲亨嘉之會。精忠儼在。衷恤庸加。具官某。慎懋而行方。沈潛

而量厚。踐揚禁近。官一品以益謙。陟降邃嚴。閱五朝而彌著。恕能及物。廉以律身。經文譯潤之功深。開宗明義。詩書服習之訓久。教子象賢。維時輔臣。佐我初政。損箴雅奏。圭璋令儀。蓋德厚者世必昌。勳著者爵宜峻。誕開公府。庸正師垣。儼精爽以如生。合神明而無愧。噫。保茲青社。斯爲胙土之崇。封以紫泥。益見蜜章之重。體茲申錫。期爾永承。可。

妻封齊國太夫人

馭爵疇功。錄先臣之大節。疏恩竝命。成賢媿之芳猷。往莫追尋。生宜悅豫。具官某妻某。秉心淵靜。制行霜嚴。悃悃無華。佐餽唯精。於五飯。溫恭有恪。執容儼稱於六珈。是生絲綸之英。復得鹽梅之佐。入室每諮於慈訓。揚庭爰著其母儀。噫。誦齊風雞鳴之詩。則貞女宜封於東土。歌魯侯燕喜之頌。則壽母益介於長年。哀對殊恩。恭承令社。可。

資德大夫同知宣政院事某贈存誠秉德功臣太傅開府儀同三司上柱國追封齊國公諡忠穆帝室興隆。君臣交孚而同德。王庭肅穆。弟兄相繼以共爲。瞻若昔之揚休。越今茲而錫命。輿言是採。卹典有加。具官某。植節秋霜。持評水鏡。侍元戎於漢上。屢奏凱功。奉大帝於禁中。益參聖諦。凜有不可犯之色。充然無自滿之心。阿閣鳳凰。虞廷屈軼。績旣昭於簡冊。望宜冠於巖廊。噫。舉賢上功。爾猶存太公之生氣。慎終追遠。卿勿忘人主之殊恩。尙其冥魂。享此休寵。可。

妻追封齊國夫人

王言惟作命。揚于庭者爲報功。內訓不出門。宜其家者爲合德。有嘉賢媼。宜盡褒封。具官某妻某。秉德芝蘭。奉身玉雪。遠行江漢之域。勸義不違。深居房闈之中。服勤無斁。考圖定地。錫命續綸。噫。取妻必齊。蓋有資於大國。從夫之爵。今已謂之小君。昭于幽局。歆我異渥。可。

監察御史沙某封贈祖父母

祖某嘉議大夫行工部事專一修築宮城勾當今贈

功臣太傅開府儀同三司上柱國追封某

國公諡武敏

式考皇猷。承命以永新邑。爰立民極。相宅以營成周。輪奐彰施。高深鞏固。言念梓材之彥。興懷械模之官。具官某。祖父某。氣壹而靜專。智圓而肅給。順陰陽。伐材木。構寶殿。以如規。議遠邇。程土功。儼金城之有截。通四方而罔缺。傳衆力以聿成。典制百工。論道時趨於清切。辨護少府。使民每減其冗煩。紫闈深教。以手書。墨詔屢傳於宸旨。宣惟際遇。允協隆平。觀設施而舊跡愈彰。思典刑而老臣彌重。誕開公爵。復廣社封。噫。召公之誥簡明。命庶丕作。蕭相之謀宏遠。俾後無加。追命煥章。營魂昭慰。可。

祖母

女教勤閨門。夫獲脩于六府。皇恩洽寰宇。死得慰於九原。嗟惟蠶臣。成手良媛。具官某。祖母某。韞玉制行。範金作程。化治絲麻。宛惜日稽功之效。絜清蘋藻。儼承先盡職之能。用施孝孫。亦克王事。方褻忠以大賚。爰追命以竝封。噫。蜜印昭天。益侈桓楹之表。脂田廣國。式崇柏板之嚴。茂對有光。靈承無斁。可。

茶迭兒局使沙正議贈父母

父某正議大夫遙授工部尙書管領茶迭兒局人匠總管

漢宮密勿之邃。彌重細旂。周廷朝會之嚴。用資陰羽。省方維歲。考古若今。具官某。父某。才敏而通時。慮深而應變。春秋蹕道。環徼廬虎士。以無譁。風雨屬車。望帳殿翠華。而有煥。倚如鹿角。整若魚麗。曉籌爭奮。以啟行。夕頓悉安。其成列。舊規儼在。故老能言。爰開大國之封。式體先朝之任。噫。相王入大次。禮猶想於肅。雖論道惟三公。恩豈殊於冥漠。詔爾後嗣。祇予至懷。可。

嫡母

世官嗣業。古罕其人。工師致功。今慎其職。具官某。母某。肅著令德。恪嬪大家。上承尊章。察素絲五紵之儉。下訓子婦。審狐腋千金之難。爰俾象賢。式克紹後。噫。翟菲崇貴。已享偕老之時。蜜章廣恩。足慰厚夜之望。子能謙謹。汝預寵光。可。

生母

佐中饋之職。必假婉柔。成繼世之賢。實資訓飭。泉遇蹇而利見。木積小而始升。具官某。生母某。勤勞大門。光寵盛代。象服之貴。宗婦攸同。鸞誥之榮。鄉人所羨。爰相胤嗣。益慎忠嘉。可。

資德大夫紹慶珍州南平沿邊宣慰使播州安撫使侍衛親軍都指揮使上護軍楊漢英贈推忠效順功臣銀青榮祿大夫平章政事柱國封播國公諡忠宣

繼世立諸侯。審象賢之有託。推恩保四海。在追遠以彌加。有懷蓋臣。庸厚恤典。具官某。著德遐域。效誠先朝。聰敏得於襁抱之初。發于天性。稚弱置於扈從之側。斷自哀衷。用能絕黨殊鄰。投戈納款。尺天寸地。負版奉圖。先國後己之慮深。尊主庇民之績著。闡學傲文翁之化。好賢師鄭武之風。雅量鎮浮。方彘弓而簾矢。澄懷味道。時緩帶以輕裘。出門輿折軸之悲。行壘應流星之兆。何以勸善。必也正名。循故壤以加勳。衍圭田而封土。青綬崇副相之貴。袞衣嚴辨章之稱。噫。忠孝傳家。于以顯昭事厥辟之實。歿存錫命。所宜推圖任舊人之終。精爽有知。欽承無斁。可。

妻田氏遵義郡夫人加播國太夫人

婦人中饋歌采蘋。則謹其承先。大夫遠行。誦殷雷。則審其勸義。禮有準則。行無過踰。具官某妻田氏。嬪高門之勳庸。受外氏之經籍。曹大家之女誠。奉上克謙。魏夫人之僭書。教兒能學。念王事靡盬之際。知女子有行之宜。夙夜傳恭。寒暑循度。噫。從夫以貴。今己位於小君。勉子惟忠。益有光於先正。茂膺異渥。式介長年。可。

開府儀同三司上柱國錄軍國重事中書右丞相監修國史拜珠松年案舊作拜住贈清忠一德佐運功臣太

師開府儀同三司追封東平王諡忠獻

八柱承天。棟橈萌於巨構。六飛御日。輻說見於中街。噫。死難以成仁。攷生榮而錫命。具官某。鼎彝王社。闕閱相門。自結主知。應雲龍之異遇。獨持國是。炳蒼蔡之先幾。陳於上者不足言。見於事者爲可則。斥聚斂

之臣以靖四表。誅黷貨之徒。以正庶官。庫無餘財。拔葵之訓。靡替。門絕私謁。歷衡之鑿。益公天下望其治。平朝廷以之模楷。然盡言招過。檢謀愈深。選賢與能。姦黨滋懼。變成肘腋。禍延股肱。川嶽動搖。日月昏翳。雖元兇正罰。足明朕心。在壹惠易名。姑慰卿意。分茅故壤。增爵維垣。噫。未明入朝。竟墮承宗之計。盛服假寐。孰爲鉅虜之賢。念此靈傷。恩斯優渥。可。

妻某氏封東平王夫人

星坼中台。輔弼之虧。果應舟藏半夜。伉儷之情。曷勝死者易名。生焉從爵。具官某妻某氏。素系相閥。克續王門。纂組之功。弗訓以習。祭祀之謹。於禮無違。偕老之志。莫酬。竝封之恩。宜厚。爰增湯沐。庸演絲綸。噫。司徒之妻。閔齊君以予邑。厥父之子。樂韓土以相攸。宜飭諸孤。以保終譽。可。

太中大夫內史府司馬狄琮贈榮祿大夫中書平章政事柱國追封冀國公諡貞毅

山西諸將之英。沈雄有自。斗南一人之裔。正直是傳。爰產魁梧之賢。以贊藩輔之政。具官某。少植奇節。壯懷孤忠。朱邸論思。引經說以開導。細旃密勿。詢治道以彌縫。挺然廊廟之姿。鬱有江海之量。才見於用。知無不言。邊陲以之救寧。帷幄以之康濟。朕纂嗣大曆。圖任舊人。方審象以博詢。慨撫髀而莫覩。興宗有似。茲爲柏臺之羽儀。追遠彌加。庸進槐階之品秩。噫。呂望老而賜履。實文王之故臣。丙吉生而受封。乃悼考之遺德。事莫能偶。恩宜有加。可。


妻張氏贈冀國夫人



遠行從政。閱勤勞者。著壹儀。修身踐言。循法度者。執婦道。允矣溫恭之媛。疏其赫奕之封。具官某妻張氏。謙以自持。儉而有守。酒食是議。春秋之祭無違。狐狸爲裘。風雪之需悉備。旣嘗艱阻。莫遂恩榮。噫。兼馨入臺。紹祖之傳彌振。僧孺清道。思母之念益深。尙其營魂。承爾嘉命。可。

妻劉氏贈冀國夫人

展如邦媛。典刑傳於大門。啍兮國英。謨謀見於藩邸。天相其配。恩與之俱。具官某妻劉氏。珩璜母儀。纂組女訓。如璞蘊石。審玉人之琢磨。若鳩在桑。信君子之均一。嗣爲烏府之模楷。母增魚軒之寵榮。噫。繼世象賢。子以錄先臣之舊。慎終追遠。庶幾彰盛世之光。綸誥下頒。營魂祇服。可。



清容居士集卷第三十七

外制

太傅右丞相巴延松年案舊作伯顏下同贈太師開府儀同三司 功臣淮陽郡王諡忠武

乾坤呈符。構風雲之嘉會。山川毓秀。挺柱石之英賢。夙奉宸猷。丕揚帝訓。惟不嗜殺人者。能得天下。而可與事君者。實非鄙夫。瞻我元勳。膺時碩望。合太平之寰宇。成一統之輿圖。生為名臣。歿有公論。太傅右丞相巴延。機沈而識遠。量重而器宏。十乘啟行。共服征南之妙算。七鷗咸駕。默傳濟北之遺編。誓衆於鼓角之初。過師於枕席之上。具宣德意。誕廣仁聲。簞食壺漿之迎。咸知已後。觴酒豆肉之賜。士向無前。是謂制勝。而屈人兵。抑亦好生。以全天道。丞相之功第一。智士之譽無雙。方謙牧以學卑。愈蒙養而用晦。角巾私第。恂恂似不能言。雞翹屬車。斷斷猶無他技。肆予纘服。躬任受遺。功成莫居。年運而往。格于皇天者。有儀可象。游於造物者。不見而章。師尙父之崇名。貞惠文之美諡。益疏王爵。庸示國恩。噫。彝器景鐘。足銘邦家之偉績。蜜章棣典。斯昭泉壤之幽光。尙其明靈。歆此殊命。可。

平章政事廉希憲母某氏贈國夫人

溫璞出於玄圃。貞松產於徂徠。良由地氣之完。以合天和之蘊。故平章政事廉希憲母某氏。柔嘉維則。淑慎其思。采蘋采藻之恪恭。為絺為綌之素儉。奉尊章於壯歲。樂其天全。率娣姒之諸郎。視為己出。齊家以

禮教嗣以忠。用能爲先朝社稷之臣。啟奕葉簪纓之慶。雖爵從夫貴。莫得而加。然義以子賢。當崇其本。益開湯沐之侈。庸增窳窳之光。是爲異恩。以旌舊德。可。

呼圖克台默色

松年案舊作忽答的迷失下同

公主追贈齊國大長公主

維王展親之道。實先於惇敘。粵昔慎終之典。尤謹於追崇。矧予同氣之賢。是惟長主之貴。廣疏異數。庸寓至懷。呼圖克台默色公主。玉海澄輝。金枝毓秀。充然婦德。成肅離以爲穠李之華。相其夫家。閔勤勞而勸殷露之義。婉順諧於日就。儉慈出於天然。美王姬下諸侯。固異公宮之制。問我姑及伯姊。益深先朝之思。胡不百年。以永終譽。肺腑之託云在。手足之念彌鍾。圭觚荐更。湯沐儼舊。爰開名國。下慰營魂。噫。立愛惟親。曷愧死生之初志。以義度德。莫窮修短之大原。沒而有知。服之無斃。可。

宗正府寶哥贈祖父母

祖某特贈推誠保運翊亮功臣開府儀同三司太尉上柱國追封恆山郡王諡忠靖

風雲初際。允資佐命之賢。歲月既徂。庸厚報功之典。竄惟平治。爰錫褒嘉。具官某祖某貫。日精忠。凌雲節。槩載囊弓矢。翊龍德於初潛。以爲股肱。展鷹揚而無敵。噫。孝文拊髀。豈惟思古之名臣。顯宗圖形。實欲方今於前世。九原可作。千載如新。可。

祖母追封恆山郡王夫人

慎終追遠。本先王之至仁。崇德報功。傳有國之令典。具官某祖母某氏。從夫早貴。訓子克賢。如山如河之

儀容宜室宜家之愷悌。肇封大國。儼焉象服之新。益慰九原。歆此蜜章之寵。可。

參知政事賈某贈官

朕丕承大業。遠究前圖。肇邦九有之初。紀綱備舉。同德一心之彥。贊畫允資。慨年運之云徂。儼風猷而如昔。具官某。經術展緒。孝廉起家。侍幾微於帷幄之中。保身彌謹。識變通於衡石之外。得士尤多。故一時出令之坦明。皆先帝欲言之旨。器能容物。清不近名。暨更南國之旬宣。咸謂中朝之倚任。方堅退佚。益避權姦。活千人有封。考於爾嗣。德百世而祀。論乃至公。爰褒賢以勸功。復易名而疏爵。噫。方叔壯猶之雅。雖已美於盛時。韋丹遺愛之碑。實有俟於今日。儼如精爽。綏我寵光。可。

淮西道宣慰使劉復亨妻趙氏贈某國夫人

圖任舊人。式表世臣之重。烝畀祖妣。用昭孝孫之賢。維德厚者慶益長。而爵貴者報必遠。具官劉無隱。祖母趙氏。鍾鼎望族。山河令儀。使節春行。從子從夫之樂備。女箴夜誦。爲母爲婦之道全。頌臺之彥有嘉。漏泉之恩采廣。高堂素象。音容猶想於含飴。故里佳城。湯沐儼疏於刻蜜。湛然精爽。歆此褒崇。可。

荆湖北道宣慰使劉澤妻孫氏贈某國夫人

孝治聿嚴。誕布蓼蕭之澤。聖謨丕顯。遐思屈軼之賢。念服瘁於外庸。允資成於內助。恩昭竝命。光慰九泉。具官劉無隱。母孫氏。里族高華。闔儀淑慎。閉戶而行。鹽饋典盡。婦儀映雪。以課詩書。咸稱母訓。栝樅之飲。猶在茵鼎之養。莫加位正小君。已備沼絜之德。爵崇大國。益擴風木之思。可。

參知政事趙世延贈曾祖母□氏雲中郡夫人

積德在於百年。實資內訓。褒封及其三世。亶謂異恩。勤勞盡臣。服襲先矩。具官趙世延曾祖母某氏。幽蘭雅度。喬木舊傳。殷露雖閱其勤。克彰忠節。采蘋不失其職。允佐肅雝。膏之沃者根必深。種之豐者穡益厚。顯于西土。咸曰大家。維爾曾孫。益彰有慶。於戲秩秩先廟。崇松楸柏板之儀。翼翼小君。承錦誥金花之寵。奉先追孝。錫類與仁。可。

平章政事董某封贈三代九道

曾祖昕贈光祿大夫司徒趙國公諡宣懿

大裘無文。可饗于帝。良玉韞璞。孰窺其珍。灼知遺逸之民。邁種渾圓之德。克昌厥後。不在其身。具官董某。曾祖具官某。賦畝怡愉。里閭退讓。開田種朮。深期蔽日之輪。困如山出雲。莫測爲霖之變化。子能擇主。孫亦象賢。一門萬石之家聲。四世五公之譜牒。噫。慎終追遠。分茅宣會。矩之光。崇德報功。推本協孫。枝之願。亶惟異渥。寵爾營魂。可。

曾祖母李氏追封趙國夫人

岷山之源。若壘而達于海。至日之影。如線而麗乎天。信知明道。不可以計功。要在積微。因之而成著。具官董某。曾祖母李氏。盤阿共隱。鱸畝如賓。惟耽積善之勤。厥享降祥之驗。百年未遠。五世其昌。噫。象服表儀。亦既慰賢勞之願。寶章刻篆。斯有昭孝治之隆。可。

祖俊贈翊運效節功臣太傅開府儀同三司上柱國追封壽國公諡忠烈加贈推恩翊運效節功臣  
依前太傅開府儀同三司上柱國改封趙國公諡忠烈

駿命握乾。誕啟中天之運。豹韜宣武。協成上國之光。念風雲之會匪常。而日月之流如駛。爰新景命。以慰故臣。具官董某。祖具官某。被褐潛珍。棄書學敵。戎馬驅攘之未定。志已出塵。雲龍會合之有開。獨能就日。察敵保臨淵之智。挽彊夸貫札之精。釋兵爲農。所活者衆。延師教子。其訓益深。馬革裹屍。深可憫生前之語。虎頭食肉。終有期身後之榮。惟德之厚者。嗣必昌。而功之著者。禮必報。肆朕嗣服。念爾疇庸。爰廣重封。以彰異數。噫。修祖廟。陳宗器。在于君臣之交。修光王室。逆天休。惟爾子孫之無斃。精爽不昧。寵渥其承。可。

祖母李氏特贈壽國夫人改贈趙國夫人

殷靈勸義。於昭媿德之賢。柏舟作詩。爰表自防之志。雖內教止傳於閨闈。而懿範備著于鄉閭。具官某祖母李氏。淑慎持家。嚴勸訓子。斥簪珥以奉賢師之饌。化絲枲以助先祭之供。衡宇周旋。人不識其面目。闔戶款洽。族猶想其儀刑。雖雙鯉之養弗居。而八龍之譽罔替。允惟賢母。有光前聞。茲予溥澤於世臣。庸汝啓封於大國。噫。先正昭事。已克光竹帛之傳。夫人起家。式歆承絲綸之訓。用昭後嗣。永肩一心。可。

父文炳特賜贈諡金紫光祿大夫平章政事忠獻公加贈宣忠佐運開濟功臣太尉開府儀同三司  
上柱國追封趙國公仍諡忠獻

君臣相資。莫喻同心之美。忠孝兩立。斯爲佐命之殊。念汗簡曷能旣其勳。而朝著猶足以優其禮。維祖有



訓。非朕敢私。具官董某。父具官某。沈毅而善謀。明恕而敦本。黑頭試邑。棄官羞墨。綬之卑。赤脚從軍。絕食望翠華之幸。刑輕典以安反側。釋降人以靖流離。白日揮戈。睥睨益張其羽翼。長風破浪。蒙衝竟擣其腹。心命在養民。市不易肆。取麥禾以陋鄭人之過。收圖書以成蕭相之功。嶺嶠宣威。南人不復反矣。朔方請使。周公方且膺之。恂恂持儒者之風。諤諤挺大臣之節。靖念不圖之建。彌深喬木之思。格于皇天。雖儻若帝庭之陟降。渙其大號。必有加玄宅之褒崇。錫以嘉名。胙之大國。掌武襲建牙之舊。開司增立載之榮。九原如生。終古永譽。噫。英才間出。足爲邦家之立基。盛德無瑕。成爾子孫之逢吉。載加殊命。以賁營魂。可。

母趙氏追封趙國夫人

鵲巢推夫人之德。於配實難。碩人歌衛侯之妻。其賢可想。具官某母趙氏。秉心淑靜。主饋柔嘉。逮事皇姑。克奉甘旨於左右。一視諸子。莫窺憎愛之後先。每傳家訓之忠勞。遂致孤兒之死事。噫。開脂田而獲上國。負謂無儔。被象服以從先塋。幸哉有子。可。

繼母某氏追封趙國夫人

國族世貴。鮮執禮以下人。王臣功高。適合符而媿德。具官某繼母某氏。敦厚天性。靜專內儀。瞻彼南山。深得勸夫之義。遵于行潦。不失奉祀之恭。有子忠賢。爲我宰輔。噫。推恩三世。庸疏湯沐之封。錫類九原。益廣蓼蕭之澤。可。

繼母王氏追封趙國夫人

嶰谷之竹。應律而氣自鳴。十洲之膠。續絃而奇乃見。不有佐餒。曷能相夫。具官某繼母王氏。組織婦工。齊莊母道。歲時鹽饋。立蘭玉以無譁。春秋烝嘗。絜牲醪而有度。嗣子極中書之貴。一門疏大國之封。噫。生也有涯。莫稱魚軒之樂。死如可作。尙歆鸞誥之榮。可。

所生母樊氏追封趙國夫人

綵衣之養。莫罄其私心。板輿之歡。遂以爲美事。念風木之永感。惜春草之寸暉。具官董某所生母樊氏。禮以母稱。義由子貴。勞謙終吉。竟莫觀垂魚擁笏之榮。一視同仁。乃預享刺蜜演綸之寵。允惟盛事。服我異恩。可。

集賢大學士張晏贈二代四道

曾祖字贈保節功臣銀青榮祿大夫大司徒追封魏國公諡文懿

章孟明經。諸孫之傳始貴。袁安卜葬。三士之言若符。膏之沃者日以光。德之厚者世益遠。具官某曾祖某。進修家塾。退靜鄉閭。乾坤轉機。後服先知之算。干戈效勇。舉宗成全。歿之悲。命也在天。幸哉有子。噫。忠孝一門之盛事。百世可知。節義千古之大閼。九原不作。聿申景命。庸建上公。可。

曾祖母常氏追封魏國夫人

盛德之報。若券取償。內訓之施。如玉韞璞。聿行尊祖之禮。益知起家之難。具官某曾祖母常氏。澹靜無華。儉勤有素。清晨佐餒。奉羔韭之肥甘。晚歲謀生。治蠶麻之靡密。積善有慶。沒世不忘。噫。魯孝孫之詩。宜告

成於先廟。魏大名之國。爰錫命於九原。服我鴻恩。亶惟異數。可。

祖英贈純德秉義功臣太保儀同三司柱國追封魏國公諡簡懿

幽蘭空林。抱孤芬而永闕。長松古澗。垂巨蔭以自完。明其道者不計功。非其身者必在子。具官張晏。祖英。德若不足。樂且有儀。遇真主之龍興。出關而俟。喜佳兒之豹變。潛邸以從。居官恥商榷之謀。接物多任俠之義。念干戈首難。彌深丘壘之思。歸鄉里自娛。益廣子孫之澤。考其篤素。允謂安行。噫。于公之門。少高。茲言已驗。畢萬之後。必大。今食其封。爰詔後人。益光前業。可。

祖母劉氏追封魏國夫人

德盛起家。允著夫人之懿。時危秉志。有高列女之風。蓋在昔以爲榮。至于今而彌顯。具官某。祖母劉氏。澡身蘭服。耽耳椿齡。重闈期冢婦之興宗。一札勸孤兒之入侍。忍乃有濟。鑄金符緘口之銘。安不忘危。考室遜飛。暈之制。屬德若是。生賢可知。噫。徂賚孝孫。已極登瀛之貴。逮事王母。益疏分國之恩。幽泉有知。純嘏無斁。可。

資德大夫江南諸道行御史臺中丞于璋贈推誠肅政功臣光祿大夫平章政事上柱國追封薊國公諡文簡

善人天地之紀。德莫有加。君子邦家之基。沒猶不朽。瞻懷遺直。追錫殊封。具官于璋。志蘊忠貞。運逢熙洽。慶雲甘露。氣和而動。植自宜。威鳳祥麟。瑞應而猛。鷲成伏。華夷屢更於中外。靖共彌保其始終。緇衣不渝。

素絲靡替。念在昔菁莪之彥。皆先朝棫樸之功。年運既徂。風猷彌遠。噫。劉寬長厚。允宜居鼎鼐之官。胡廣中庸。謂當久臺閣之任。事乖往古。恩浹九原。咨示營魂。服我休命。可。

妻某氏追封薊國夫人

慎終追遠。先王惇俗之盛心。崇德報功。治朝馭臣之大勳。恩褒臺彥。澤及闔儀。具官某妻某氏。靜淑自脩。柔嘉彌謹。珩璜有節。動常法於女箴。圖史自娛。身不逾於內則。傷哉無子。貴也從夫。脂田廣。大國之封。蜜印慰九京之望。噫。瑤琴別鶴。早已棄於人間。寶劍化龍。竟相從於泉下。尙期冥漠。歆此龍光。可。

茅山第一峯大茅君特加封東嶽上卿司命太元妙道沖虛聖祐真應真君

靜慕玄風。灼觀往事。無爲曰道。必刻意繕性而始成。修身乃真。非積行累功而莫就。大茅君奇操矯俗。精思集虛。壹德齋心。受龜臺西華之祕旨。萬靈受職。開金陵句曲之宗壇。丹光千載。以如新寶氣。三峯而彌固。發祥肇社。民到于今。稱之。逆雨寧風。天之所助順也。宜惟作聖。允合祐神。孔蓋翠旌。祀莫嚴於司命。瓊文藥簡。禮爰謹於秩宗。假茲聰明。佐予平治。可。

茅山第二峯二茅君特加封定籙右禁至道沖靜德祐妙應真君

合人心。理萬物。禮宜順於鬼神。建皇極。錫庶民。徵有稽於陽雨。大江以東之地。句曲維望而尊。土樂昇平。歲稱稔足。二茅君中峯司命。西華鍊形。作牧審煩擾之非。修真得恬悅之要。騶鸞導從。損籙儼奏於雲中。化鶴來歸。城郭時看於華表。朕方推仁以濟衆。靈宜妙物以祐民。學道受之以神。端有宗於李耳。望祀不

祈其福。誠慕深於漢文。嘉與函生。誕敷景命。可。

茅山第三峯三茅君特加封三官保命微妙冲慧仁祐神應真君。

氣化爲神。握陰陽而執要。物來能應。遇水旱以成功。茲山之靈。以氏爲號。三茅君不導引而壽。體素純爲真密。從蒼龍承左右而無間。時乘白鶴。侍伯仲以遠遊。荷天降休。爲民請命。逍遙容與。服光景以如新。周流常羊。蒙祉福而無極。肆加褒錫。丕應隆平。埋鼎高峯。爰慕軒轅之有道。獻金空谷。方薄光武而不爲。周赫厥靈。同歸于治。可。

吳全節特進上卿玄教大宗師

運開至治。法簡易以合泰元。教審宗傳。隆繼承以明正嗣。用揚渙號。誕聳具瞻。具官某。孝友中乎準繩。詞華鏗乎金石。居無思。行無慮。粹然令名。禮爲翼。知爲時。協于王度。陟降紫宸。而匪懈。贊襄琳館。而益謙。詞珠在淵。雲五色而川媚。納息于踵。風八景以星從。維列聖嚴珪幣之薦。以格天。而乃祖受劍印之錫。而展世五十餘年之帝顧。卑己行權。三千之徒。首汝賢。小心盡瘁。俾超華貫。爰做舊階。侍清祠以表羣公。度玉壘而膺六命。祇若具訓。允爲異恩。噫。奏陰陽之和。以祝釐。則諸福可以畢至。通神明之德。以事上。則庶績底於咸熙。守慈儉以佐無爲。遵希夷而贊有道。式觀素履。庸佩綸言。可。

三十七代仙姑馮淑真特封靖明貞素夫人

紹玄風而展世。丕闡帝猷。溥內則以疏恩。勉從人爵。仙姑馮氏。簪纓素緒。顰悅芳儀。媿穀城之傳。益師清。

淨守柏舟之操。采固堅貞。受社惟深。錫名斯侈。雲龍風虎之慶會。亶謂有光。舞鳳迴鸞之制書。懋承無斁。可。

昭應宮提點王氏金蓮特贈淵靜玄素真人

寂然不動。知來去之有因。湛焉長存。宜死生之無間。辭風雲之際會。竟穰穰於世塵。爰加異恩。以彰殊遇。昭應宮提點住持王氏金蓮。早塵椒掖。晚謝藥宮。修崇密契於九重。錫賚屢承於三接。淨如止水。斯爲至道之宗。脫若太虛。實本重玄之體。尙歆嘉號。庸表將來。可。

長春宮提點常某授玄門演道大宗師掌教真人管領諸路道教所商議集賢院道教事

治國以無爲惟宗。式符要道。順物乃自然之理。允謂至言。長春宮提點常某。橐籥重玄。著龜萬變。氣超渾沌。灼知天地之根。運際昇平。默贊陰陽之化。方獨立以不改。彌大盈而若沖。爰紹真風。以彰人望。噫。內觀形影。斯泉石之素心。外飭身名。實朝廷之異渥。保茲清淨。俾以闡揚。可。

昭瑞宮提點張惟一特授全德靖明弘道真人太一宮提點

神以知來。至教匪存於象設。人惟求舊。裏封首錫於龍飛。念扈蹕之宣勤。默儲祥而介福。坤元具訓。渙號揚綸。昭瑞宮提點張惟一。泉石古心。冰霜雅操。侍晨長樂。澹焉若樸。而妙感彰。澄觀穆清。廓乎不驚。而衆虛集。惟才全者德不競。而正靖者明愈昭。闡道王庭。葆真沖館。噫。有國之母。以長久爾。尙謹於祝釐。立天之道。曰陰陽。當益思於觀復。恭承嘉命。助贊無爲。可。

廣誠靈妙演法真人江南諸路女冠諸宮觀都提點邵靈瑞特追封宗師

二儀之生。根於太極。萬物之母。始於有名。推剛柔迭用之原。悟坤乾交泰之理。茲焉觀妙。足以表微。具官邵靈瑞。野鶴孤標。金芝內行。賣麻姑之清淑。允謂地靈。慕南岳之冲虛。聿工草聖。通章帝闕。備問宮闈。燁矣龍光。守大盈而自牧。端然蟬蛻。享上壽而弗居。道氣常新。仙風不墜。噫。女孺朝徹。已傳宗師之篇。帝堯時雍。爰有化人之國。錫茲美號。昭我鴻恩。可。

冲靖靈妙凝真法師玄元萬壽宮提點盧行益襲封真人

道要易爲功。必假相傳之祕。名盛難與繼。益求自治之方。矧茲女冠之慎修。爰出朕綍以示勸。具官盧行益。冲澹若璞。謹飭自繩。侍藥珠之宮。宣琳琅而不瀆。守萼綠之訓。視金玉以如遺。惟清淨者玄學之宗。惟簡素者師資之本。斯焉無忝。足以有承。噫。誦赤松中誠之經。卑退爲德。考南岳內傳之旨。齋戒是先。可。

五雷宗師冲靖先生留用光特加封五雷宗師冲靖至德昭應真人

天地交泰而雷出。奮風霆流形而物露生。神行兩間。因體而始有用。數合五位。由柔而後成剛。乃知變動之機。不出陰陽之妙。五雷宗師留用光。參合太始。摩盪無垠。學道從師。罹厄窮而不悔。救災禦患。卒輶斂以如遺。詞諸長老之言。考以輿圖之載。損之又損。承禎之語。若符生而不生。介象之歸。非異運隆累洽。道慕重玄。思其人如欲見之。宜加給誥。告諸往而知來者。益勵羽流。可。

通妙葆真先生高士易如剛特加封通妙葆真文教真人

式觀修真之徒。多出好古之士。伯陽柱下。習典禮而道成。弘景山中。博載籍而書備。高士易如剛。學通羣藝。妙集衆虛。師清淨以避堂。可謂簡矣。問鬼神而前席。殆將近之。章編之繼絕。執傳洞章之補亡。猶在無文不立。松風恍其步虛。與時偕行。草露晞而羽化。方企崇玄之館。爰思列仙之居。本無名而有名。庸彰往古。效先覺者後覺。庶勸將來可。

臨江路閣阜山萬壽崇真宮住持四十六代傳錄嗣教宗師楊伯晉陞加太玄崇德翊教真人

性出於無始。存存爲成性之門。道合於有爲。生生乃得道之奧。式觀載籍。爰有至人。吐故納新。以調其神。齋心服形。以制其炁。于以濟衆。因茲延齡。具官楊伯晉。守樸丹丘。潛珍琳館。止息以踵。陋熊經鳥申之迂。藏珠于淵。握龍變虎騰之要。開九籀之祕記。傳八景之玄文。問年今見其復丁。會月密推其納甲。天台之召司馬。損數術以理身。羅浮之迎軒轅。徹聲色而合德。朕悉茲理。卿無復言。聿加綽命之殊。以重羽流之選。噫。居安易之序。所當明天地之根。修身德乃真。宜益究坎離之用。贊敷皇極。懋協鴻禧。可。

毛穎達封真人

主祭丁  
甲神

道萬物之奧。非虛不能以通微。誠百行之源。惟靜斯足以制動。聿求佐理。爰慕希夷。茲得有恆之人。以贊無爲之化。崇真宮提點毛穎達。澄心止水。植節貞松。禮爲翼。知爲時。澹然無競。巧若拙。辨若訥。休乎有容。藏名琳館之珍。養粹玄門之望。維昔世祖。動遵軒轅。占瑤光以探五行之情。通紫煙以嚴六子之用。山林肅潔。星斗爛明。苟非其人。靈弗顧矣。不懈于位。爾其勉之。庸加綸誥之隆。以示真卿之貴。噫。乾元天下治。



也。沒明用變之功。神物聖人則之。敬謹祝釐之效。有嘉恬靖。永保恪恭。可。

清容居士集卷第二十八

表 附

進五朝實錄表

皇祖有訓。聿成四繫之書。大曆無疆。允續五朝之治。夙陳載筆。上徹凝旒。欽以邦啓治平。運符熙洽。禮樂刑政教化之具。炳若丹青。典謨訓誥誓命之文。昭如日月。維累聖繼承之述。作實皇家混一之謀。猷官謹具。寮書嚴信史。雖編摩之匪一。幸聞見之悉同。欽惟陛下。祇奉鴻圖。光膺龍御。惟天佑于一德。咸曰湯孫。受命丕若。歷年悉循堯道。仁宣孝治。學廣文明。臣某等職忝汗青。官慙尸素。帝王之制可舉。今已稔於鉅編。詩書所稱何如。願有光於億載。

賀册皇太子表

黼辰當陽。首重升儲之建。彤庭叶吉。誕承鏤册之頒。宗社以貞。幅員胥賀。中賀切以天下之本。在國在家。皇極之言。是彝是訓。然知子莫若父。故立嫡必以賢。二美斯完。羣情允屬。信爲非常之慶。實開太平之基。欽惟陛下。駿命溥將。燕謀敷遣。本支百世。咸推受震之亨。壽考萬年。益著離明之象。臣等濫巾臚仕。欣覩上儀。金石鏗鏘。知協風之從律。乾坤清晏。瞻景耀之宣精。

賀册皇太子表

代宜徽院作

乾坤合德。立鼇極以建中。日月繼明。奉龜圖而示吉。誕敷渙號。允迪震亨。中賀欽惟陛下。寶曆儲祥。璿源衍慶。立嫡以長。遵三代有道之常。受命於天。膺萬年永保之裕。惟知子莫若父。故治國先齊家。上當帝心。下定民志。臣等恪共內府。欣際昌辰。太極稱觴。效驩呼而率舞。寢門視膳。嚴唯諾以致恭。

賀正旦表代宣徽院作

泰元衍策。百二十日以為春。乾御當陽。於千萬年而受祐。紫清叶奏。丹陛傳臚。中賀欽惟陛下。盛德在躬。至仁育物。象闕而垂治法。祖訓是繩。獸樽以招直言。皇猷滋聞。嗣歲蒼規之始。羣生玉燭之和。臣等班辨外朝。職嚴內宰。雲迴龍袞。肅瞻天日之光。星拱鷓行。虔祝岡陵之壽。

賀武宗皇帝登極表

乘龍御天。握純乾而居正。斷鼇立極。奠下土以宅中。百辟一心。四方胥賀。中賀欽惟陛下。聰明合道。智勇冠倫。承詔撫軍。展素書之奇略。登途受璽。昭黃屋之珍符。惟謳歌曆數之有歸。緊祖考神祇之允格。丕基永紹。景命不移。羣僕后以來蘇。政與民而偕樂。臣等班瞻文陛。瑞仰層霄。頒度量以朝諸侯。三千同德。垂衣裳而治天下。億萬斯年。

賀皇太后表為都省作

六飛夾日。奉大曆於聖人。五色補天。歸玄功於文母。事關宗社。慶浹宮闈。中賀欽惟陛下。教闡周南。德參太極。以慈為寶。夙資保佑之勤。維道積躬。聿致怡愉之養。顯坤元之光大。卜鼎命之延洪。臣等幸列周行。

欣承嘉會。瑤池晝迴。樂四表之驩心。玉殿春迴。衍東朝之曼壽。

賀聖節表本院

天開景運。篤有道之曾孫。電繞神樞。受介福于王母。觚棱瑞靄。閭闔儀傳。中賀欽惟陛下。誕紹蘿圖。丕承葆命。至仁育物。得秋而萬寶成。盛德在躬。居所而衆星拱。當立經陳。紀之始。新省刑薄。斂之規。郊廟肇禋。朝野胥慶。臣等名汗玉署。目極璇霄。廣文王有聲之詩。載歌律呂。衍中宗無逸之壽。虔祝華嵩。

賀聖節表代宗正府作

乾御當陽。甫際中天之運。斗樞繞電。式臨彌月之祥。絳闕青葱。瑤京肅穆。中賀欽惟陛下。聰明合德。孝友根心。偃武修文。百神歆而九廟格。敦本崇化。皇極建而庶績熙。爰開有道之長。斯衍無疆之慶。臣等職靡邦憲。身阻廷趨。有王者興。行見溫洛榮光之瑞。祝聖人壽。願增泰元神筮之書。

賀皇太后冊寶禮成表本院

蘿圖衍瑞。丕昭景命之祥。寶冊騰徽。誕紀慈元之懿。聖心祗恪。子道昭揚。中賀欽惟陛下。稽古聰明。事親愛敬。有國之母。以長久致養。聿嚴天道之要在陰陽。飭躬彌謹。禮行中禁。慶洽九圍。臣等職近鼇頭。班聯龍尾。玉卮前壽。肅瞻長樂之儀。彤筆特書。願廣思齊之聖。

賀皇太后冊寶禮成表代宗正府作

黃鐘應律。協陽德之初亨。寶冊告廷。奉坤元之至養。尊歸慈極。慶洽治朝。中賀欽惟陛下。愛敬積衷。順承

法道雍雍肅肅。聖實本於大任。怡怡愉愉。孝有光於唐帝。日嚴初政。風動八方。臣等恪謹國章。欣陪班著。瑤池晝迴。幸預聞管籥之音。玉笋春融。願虔祝岡陵之壽。

賀皇太后册寶禮成表

爲都省作

乾旋坤轉。定妙算於宮闈。月吉辰良。鏤徽音於典册。東朝禮著。九寓歡騰。中賀欽惟陛下。聖嗣大任。道廣以天下母。游神清淨之居。惟泰元尊。致謹怡愉之養。允持慈寶。益屆壽祺。臣等會弁鵷聯。趨庭贊。陽回玉琯。八音首協于黃鐘。春滿瑤卮。萬歲齊呼於紫禁。

賀聖節表

寶曆建元。協重華之嘉運。瑤光貫月。開上聖之貞符。盛德在秋。昊天有命。中賀欽惟陛下。智仁御極。孝友根心。丕顯王謨。端拱巖廊之上。達觀新邑。式均道里之中。取泰象於坤乾。合離明之日月。璇璣叶紀。玉斗儲祥。臣等祗率班聯。肅瞻清穆。宜昭鴻業。載歌七月之詩。耆定武功。願繼萬年之雅。

史局謝錫宴表

立朝載筆。交懷惕日之慙。就館肆筵。申錫需雲之寵。恩傳宮禮。光動廷紳。中賀欽惟陛下。黼黻先猷。憲章祖武。謂丹青信史。紀二聖之鴻文。念鉛槧微勞。屬小人而燕賚。魚藻歌騰於周室。鳳簫聲遠於鈞天。屆視朔以迎長。粲飛雲而奏瑞。上追稟飫。下陋權輿。臣等愧匪食功。懼惟飽德。陽剛初復。太平歌既醉之詩。天威不遠。下拜祝無疆之壽。

賀正旦表爲都省作

會謹天朝。文命敷于四海。曆司人統。攝提正於孟陬。率由舊章。曰爲改歲。中賀欽惟陛下。道裁天地。政在璇璣。崇鄉黨以厲賢才。聿嚴親策。詔郡國而謹牧養。爰廣使軺。東漸西被。以如春小往。大來而交泰。禮行雅壽。捧瑤畢於東朝。親納直言。開獸尊於前殿。亶惟平治。允際亨嘉。臣等祇率鷄行。肅登龍尾。弘敷五典。愬退食以罔功。永保萬年。敢矢心而善頌。

賀正旦表本院

清臺課曆。允符顓頊之元。明堂視朝。茂正攝提之位。陽迴象魏。儀贊鴻臚。中賀欽惟陛下。經緯人文。財成天地。審賢良知。古今之體。能勵廉隅。謂吏道以法令爲師。益嚴品節。剛健密參於太極。怡愉深謹於東朝。車駕蒼龍。導迎木德。樽開白獸。詢採芻言。臣等材乏頌椒。恩叨給札。春王正月。推五始之大原。天子萬年。納八荒於壽域。

賀皇太后正旦表

歲在攝提。叶孟陬之令月。曆符顓頊。開太始之上元。時屆履端。天綏眉壽。中賀欽惟陛下。清心慈儉。至養怡愉。數往知來。利永貞而坤厚。體中居順。祉元吉以泰亨。徽音惟日以恆新。懿德如春而益暢。臣等職叨視草。才乏頌椒。絳闕五雲。王母險臨於黼座。玉卮萬壽。神堯親捧於瑤階。

全德泰寧福慶皇太后尊號冊寶禮成賀皇帝表爲都省作

皇矣上帝。丕昭立極之功。至哉坤元。申衍得名之典。禮行宮壺。化被寰區。中賀欽惟陛下。敬養日嚴。文明天縱。謂聖德無加於孝。爰盡討論。而天子必有所尊。載揚徽美。御未央而登冊。卽長樂以展儀。鳳泊鸞飄。寶刻永光於秦璽。雲蒸霧起。翠華親下於堯階。協氣醇和。嘉生博厚。臣等班聯會弁。壽介奉觴。太微三光之庭。烟燭交泰。有名萬物之母。允合永貞。

賀皇太后正旦表

丁巳爲都省作

正月始和。資坤元而蕃衍。兩儀交泰。綏壽祉以亨嘉。德協青煒。瑞浮紫禁。中賀欽惟陛下。寶慈作則。履順行仁。龍袞捧觴。喜溢椒花之頌。龜臺簇仗。坐觀冀莢之祥。審孫枝之正傳。定國本以蚤建。邦家大慶。朝野均懽。臣某等祇率鷄行。式遵鳳曆。正時成歲。百廿日以爲春。利用厚生。萬億年而受祐。

賀皇太后正旦表

集賢院

律衣視旦。丕彰立極之功。鳳曆頒春。誕合建邦之歲。笙鏞翕釋。黼黻昭明。中賀欽惟陛下。道協母儀。教參女史。承顏致養。順德備於九重。正位在中。行願符於六五。朝贊聖神之治。禁傳慈儉之謨。臣等叨侍近班。肅瞻嘉會。玉卮爲壽。儼寶殿以雲從。金篋賜齡。樂瑤池而畫燕。

賀册皇太子表

集賢院

前星定位。仰宸極之聖謨。陽月臨軒。法坤元之慈訓。光騰鏤冊。儀謹傳臚。中賀欽惟陛下。稽古行仁。憲天合道。知子莫若父。審恭敬之積中。治國先齊家。盡怡愉而致養。惟宗祊繼體之事大。玩易爻重明之象深。

著龜協祥。七鬯承嫡。臣等職庶珍館。班肅彤庭。喜溢龍顏。虎拜咸呼於萬歲。禮嚴鶴駕。鸞和共後於三朝。  
册皇太子賀皇太后表集賢院

承天正位。詒謀啓於重闈。諏日揚廷。渙號昭於寶冊。大明繼照。萬邦以貞。中賀欽惟陛下。色石功深。黃裳德順。以似以續。降葆命以丕基。是訓是行。席蘿圖而端本。知立嗣必子之有自。審建儲非私之惟公。施于神孫。絜我文母。臣等職庶清貫。班肅上儀。簫韶九成。願盡稱觴之慶。本支百世。式瞻主鬯之尊。

皇太子兼中書令賀表代宗正府作

黼辰當陽。懋對紫宸之慶。玄龜叶吉。丕昭寶冊之光。八音播廷。羣公會弁。中賀欽惟陛下。悅親有道。立賢無方。謂一人元良。勢實尊於藩翰。而中書政本。命尤慎於樞機。孝友宜昭。仁慈溥博。臣等恪司成憲。欣覩緝儀。卜七百年。願衍周家之曆。上千萬壽。咸趨漢殿之班。

賀正旦表集賢院

丹辰當陽。頒發春之仁政。清臺治曆。符建國之昌期。日之方中。天其申命。中賀欽惟陛下。澤漸滲漑。心玩神明。盤銘監觀。德又新而無斲。河圖則象。祉元吉之有恆。默樽設席。以招言。龍袞坐朝。而問道。臣等瀛洲布武。閭闔詔儀。玉燭豐穰。用制九年之蓄。紫清蠖淺。業隆萬世之基。

賀皇太后正旦表丙辰爲都省作

鸞指蒼龍。密叶昭華之瑄。雲開綸翟。首稱長樂之觴。順履始和。懋隆元吉。中賀欽惟陛下。儉慈作則。清淨



頤神色石功深。妙裁成而交泰。黃裳位正。盡滲漉以皆春。母儀循四序之周。聖孝衍三朝之祉。臣等職明輔相。效愧變調。拜捧椒花。慶載臨於元日。宴觀桃實。祈永保於萬年。

賀正旦表 壬戌本院是歲閏五月

肇祚發春。仰正陽之布治。歸餘成歲。審長至以觀生。黼辰昭明。彤庭肅穆。中賀欽惟陛下。仁推滲漉。道協際蟠。修德錫符。驗陰陽之消長。發號出令。則天地以裁成。念丕圖演繼于祖宗。究盛禮益嚴于上下。臣等瀛洲接武。文石趨班。閏月定時。泰治密齊於七政。皇極錫福。北元永保於萬年。

賀太皇太后正旦表

地天交泰。陰教法乎坤元。閏餘歸終。寶曆增于夏五。陽浮中禁。瑞藹重闈。中賀欽惟陛下。端懿母儀。慈明內範。怡神少廣。悟黃中通理之爻。辨秩東郊。樂青煒登平之景。曰惟肇歲。茲用儲祥。臣等給札承恩。肅班稱慶。筆徽音於彤管。歲不絕書。望長樂之璇宮。天惟曼壽。

進仁宗皇帝實錄表

君臨十載。式昭垂世之謨。聖治萬方。庸謹繫年之錄。編摩玩愒。敷奏凌兢。欽以仁宗皇帝陛下。濬哲積躬。欽明稽古。發揚乾健。預清宮以候先皇。祗奉坤元。虔問寢而娛太母。審俗周知於民瘼。授時彌切於歲豐。謂養性存心。宜採於傳記。而脩身治國。必取於禮經。監觀歷代之著龜。夷考前王之軌範。政要採諍。臣之讜議。大學芟衍義之浮辭。爰譯成書。用裨博覽。至若譽髦斯士。擢不次以待非常。爵人於朝。表有功而抑

妄進。每遵帝範。肇立儒科。廣祖宗百年未備之訓。示子孫億代永貽之訓。珠玉非寶。旁招菁莪之賢。農桑惟勤。旋致嘉禾之瑞。惡衣服以申綠履之禁。省畋獵以彰開網之仁。增胄子之官資。限計吏之品級。爲民請命。匪營一己之福田。遇裁秉誠。果應自天之甘澤。與人不求備。從諫如轉圜。河徙故灘。謫斂臣於嶺徼。雪深前殿。憫戍卒於邊防。常思創業之艱。益慎守成之效。道傳精一。明授受之至公。孝竭怡愉。協繼承而無間。凡茲殊美。冠乎羣倫。滯毫惟懼於荒蕪。削牘復虞於缺軼。雖盡巧心於舉要。蔑窮茂績之救功。欽惟陛下。葆命誕膺。鴻圖丕顯。窮神知化。彰明聖之鋪張。詢事考言。採臣鄰之記注。屢宣睿旨。迄萃鉅編。雖天地之德。無俟於贊揚。而日月之光。有資於繪畫。臣等職叨率屬。識乏簡僚。慕永貞之謹嚴。詞慙韓愈。稽太初之直核。筆愧馬遷。

舊制進實錄表。文有短長。然未敢以數聯直致。伏觀聖朝二帝實錄進表。必加詳盡。摘其所行事跡。以序篇首。栢大德中。嘗進五朝實錄表。未免倣效前作。今輒不換。遵守舊制。讀成一篇。或恐繁蕪。別有副本。庶便宣讀。

又

十年御極。聿脩四繫之編。億載揚休。殊乏三長之筆。祇成信史。上徹宸旒。中賀欽以仁宗皇帝陛下。仁靜根心。溫恭合德。詩書造士。聞學制以設科。法律爲師。嚴官規而限祿。誦經作則。稽古鑒今。所寶惟賢。卻獻琛而弗尙。莫大於孝。謹視膳以彌加。著龜定主鬯之公。械樸藹奉璋之衆。宜登琬琰。永祕縑緗。欽惟皇帝陛下。慕切羹牆。令行金石。率時昭考。撫言行以無遺。迪惟前人。繼聖明而有造。臣等尊聞傳信。竭思纂題。

閱歷歲年已深慙於尸素。經緯日月期不朽於汗青。

賀正旦表癸亥爲都省作

歲正天門陳揆治朝之位。曆新人統肅嚴魏闕之班。四表迎祥。八風順律。中賀欽惟陛下。仁施滂澍。命受溥將。輔相財成。別忠邪而無黨。斟酌損益。合禮樂以同流。圭璋藹多士之良。玉燭兆大田之慶。華繩乾健。藁籥泰亨。臣等補衮功慙。更弦政拙。萬年永錫。仰瞻太極之尊。六甲既周。行履上元之運。

賀聖節表癸亥爲都省作

十月爲陽於赫發祥之兆。一人有慶丕昭嗣服之初。出日之升。降年以永。中賀欽惟陛下。斂時錫福。握乾闡珍。玩天地之心。陽初升而來復。發雷霆之令。陰早辨於履霜。繩祖武之雍熙。格民風而醇厚。道尊泰壹。運接上元。臣等叨列近司。欣逢盛旦。望翠華之行御。瑞藹五雲。趨絳闕以傳臚。齊呼萬歲。

牋

賀皇太子受册牋爲都省作

禮殿中禁位建承華。萬國以貞。咸曰吾君之子。四方來賀。永底烝民之生。中賀敬惟殿下。玉璞蘊珍。金枝表秀。繼體而承七鬯。如歲之春。定志以協蒼龜。維天其祐。方謹雞鳴之間。聿新鶴禁之居。某等叨列政司。欣傳制命。父子君臣之道。備允廣緝熙。詩書禮樂之教。崇式符繼照。

賀皇太子受册牋代宜徽院作

範金作寶。禮成內朝。簇仗演綸。驩騰四字。協春秋之大義。覃雨露之殊恩。中賀敬惟殿下。岐嶷天成。溫文夙就。佩規帶炬。正言正事之教成。執玉奉盈。事父事君之道備。某等叨司庶府。欣覩盛儀。仰黃道之日長。式符離照。候明堂之星潤。允謂震亨。

賀皇太子受册牋本院

體元更始。肅瞻玉裕之姿。崇德計勳。肇錫朱明之服。宗支襲慶。國本奠安。中賀敬惟殿下。英睿夙成。藝文天縱。清宮朝邸。朱虛之功爲高。審俗迎郊。孟侯之賢允似。受介福于王母。繼明照於四方。維軍國之樞機。實政化之橐籥。名倡百辟。兩儀正而五緯齊。德和萬邦。九穀熟而三農足。某等職叨掌綽。欣覩揚庭。紀王子之吹笙。有慙斧藻。歌堯民之擊壤。願廣丹青。

賀皇太子受册牋代宗正府作

盛德動天。誕受元良之册。萬邦爲憲。悉資文武之賢。政本增崇。皇基鞏固。中賀敬惟殿下。圭璋王度。黼黻聖謨。整齊乾坤。指揮於旋轉之頃。肅清宮廟。怡愉於定省之間。宜惟不世之勳。庸舉非常之典。某等職司宗籍。欣覩王綸。磐石旣安。願上則百斯男之頌。權衡允稱。克成曰三有俊之功。

賀皇太子正旦牋爲都省作

曆起上辛。啟自天之申命。歲行維戊。瞻出日之重光。萬宇薰陶。九垓滲漉。中賀敬惟殿下。功調玉燭。政察璇璣。宴錫龜臺。密承歡於王母。仗移鶴禁。親奉壽於神堯。維春之祺。有秩斯祐。某等導迎嘉節。贊詠清時。

候銅瑄之陽和。式占泰定。望青宮之葱鬱。允協震亨。

賀千秋節牋代太保府作

月映彩雲。慶仰猗蘭之瑞。令行青陸。書占玄駟之祥。維春之祺。粵上斯已。中賀敬惟殿下。宅心聖學。匡力皇圖。廣邦家太平之基。澤窮滲漉。察天人同心之理。下逮芻蕘。仁孝合名。中和叶德。某等展儀。殷且。僕首叢霄。壽考萬年。敢陋千秋之頌。本支百世。願陳大雅之詩。

賀千秋節牋代魯事院作

甲觀畫堂。仰紀吹銅之瑞。瑤山玉彩。特書主鬯之勳。維莫之春。初吉云已。中賀敬惟殿下。蒼規體德。銀漢儲祥。稽七政之有恆。實循冬夏。消羣陰於交泰。爰法坤乾。興鴻文以闡基。握龍圖而佐運。兩宮定省。雍容化日之長。四表謳歌。瞻後前星之耀。某等具寮無補。盛旦有光。奉曲水之羽觴。齊呼曼壽。探泰元之神策。允謂延洪。

賀皇太子正旦牋本院

青規紀曆。甫開嗣歲之祥。蒼震布和。懋協少陽之象。自天申祐。與物為春。中賀敬惟殿下。經緯人文。權輿政治。三朝交泰。聿嚴盛禮。以奉觴。四德尊乾。行美成功。而琢玉。卜稔已符於祈穀。登賢深味於拔茅。慶洽宮闈。仁施寓縣。某等叨塵顧問。欣覩亨嘉。聲徹鳳笙。仰非霧非煙之瑞。班隨鶴駕。歌重暉重潤之詩。

賀皇太子正旦牋為都省作

歲正璿璣不應震亨之象春先寶曆允符泰治之祥絳闕光華青宮葱鬱中賀敬惟殿下道隨陽長德與日新玩易中行密包荒而塊圮法天繼照永主器以彌綸稱觴前殿以承顏侍宴瑤池而受福某等禮成鶴禁敬謹鳧趨祈穀躬耕預卜金穰之兆頌椒介壽欣瞻玉裕之姿

賀皇太子受册集賢院牋

明堂辨儀哀對重輝之耀昕朝發册丕昭上嗣之賢宗社救寧幅員驩慶中賀敬惟殿下孝仁生稟禮樂夙脩一人元良羽翼靡煩於商皓百揆時序英威共仰於秦王鶴駕之御日三烏輪之光明兩某等叨塵仙館末綴臚庭瀛水汪洋望瑤山而親切宸居嬾渡瞻青路以陪從

賀皇太子正旦集賢院牋

大曆更新叶皇祖建元之祚少陽正位隆神孫承嫡之基百辟是儀五辰攸敘中賀敬惟殿下應乾作命受震行仁嘉禮告成歸妹祉吉之象外朝佐治同人文明之祥日就月將而緝熙小往大來而分類某等肅瞻玉裕謹候青煒詠歌重光紹天休而繼照弼諧庶績占歲在之有年

賀千秋節國恤未餘月百司皆牋

電繞斗樞允昭甲觀之瑞日昇暘谷行受明堂之朝宗社底寧神祇協相中賀敬惟殿下欽文師古剛健變天域躡在淵龍德合乎中正永言配命龜圖闡其延長仰震夙之非常審傳付之素定某等肅瞻晬表獲際重光聖孝有加羹牆之慕彌切民情共戴岡陵之祝益虔

賀千秋節牋本院

心居天位。前星耀於明堂。卯爲春門。大電騰于甲觀。盛德集福。至和儲祥。中賀敬惟殿下。體仁法元。師古合道。溫恭事帝。密贊化以生成。問學積躬。益緝熙而光大。疇選黃髮之彥。庸佐青闈之規。如日之升。降年有永。某等肅瞻英偉。虔祝簡穰。輯往則於瑤山。一辭莫措。採賜齡之金篋。曼壽是期。

賀千秋節牋爲郡作

玄貳發祥。丕顯吹銅之瑞。蒼龍協紀。式昭主器之符。紫禁權騰。璿源秀衍。中賀敬惟殿下。溫文秉度。仁孝積躬。侍宴瑤池。令德令儀之可述。問安內寢。正言正事之足聞。如歲之春。自天其祐。某等導迎穰簡。贊詠中和。瞻出日之舒遲。重光允繼。望彩雲之葱鬱。曼壽是期。

賀皇后正旦牋本院

王春謹時。肇正內朝之治。帝曆更始。益嚴中禁之儀。與物咸亨。自天作合。中賀敬惟殿下。矩循內則。言法徵音。關雎詠歌。禮避乎蘭殿之貴。卷耳思念。頌取于椒盤之文。稽陽德維。如歲之初。考陰教曰。履端于始。某等清班接武。穀旦趨朝。日月竝明。願上千萬之雅壽。天地交泰。載歌元二之太平。

# 清容居士集卷第二十九

啟

上王尙書

伏以瞻望聲容。幸有登龍之舊。披陳悃愾。暫無吐鳳之長。圖鼓勇之新功。冀鑄頑於大造。掃門受業。械積致詞。切念桷生不逢時。長始知學。伶俚素緒。綺襦執袴之習無聞。零落青編。漆簡汗書之藏曷見。久知我輩。固當投之濁流。靖念斯文。豈宜束之高閣。操觚而歎。詎秉異心。倚柱而歌。終持正色。胸臆結約。肝膽輪困。惟其用拙於今。將欲脩名於後。載惟宏博。世號殊科。夷考哲賢。咸稱異數。當紹聖之首創。蓋以窮經爲先。至大觀之重刪。乃因代言而設。唐朝疎略。故退之自笑其俳優。宋制精詳。至文公欲加以深厚。維較藝於詞苑。杳若探丸。雖置身於書林。悉同畫餅。苟非討論於暇日。孰能敷奏於一時。爰取舊規。各成要覽。涼水之尙德。筆纂金梓。義山之好奇。文編玉府。初學記資。騷人之屬對。稽古編假。進士之試文。博要之稗於丁年。統類之塵於乙夜。斯皆品節之效。可爲區別之模。然獨此書實難其例。千門萬戶。恍焉莫知所之。六律五音。聞之不喻其意。至若寢門路鼓。遂成君子之欺。御庫神弓。終藉老兵之對。望洋之歎。浩浩測海之智。嚶嚶一物不知。過亦多矣。兩端而竭。恥莫甚焉。信知梓慶之巧專。益訝庖丁之技異。伏惟內翰尙書先生。南州元老。故國重臣。望壓縉紳。聊復浮湛於閭里。文驚華夏。未妨談笑於江湖。恥申公之蒲輪。便管寧



之紗帽。樹人爲急。樊士尤先。子誠齊人。侈以都邑之富。波及晉國。化其潢汙之卑。是用忘揣顛蒙。惠微恩育。鉤玄提要。在明公爲壯歲之筌蹄。糾繆繩愆。於後生爲百世之模範。儻獲書傳於琬琰。尤當襲藏於巾箱。與汝共之。深議中郎之隘。非吾徒也。尙祈夫子之憐。欲報無從。未言先愧。

謝王尙書

拔叔度於幼童。深慙非偶。執李膺之下御。竊喜同時。敢緣擁籥之恭。庸致摳衣之請。袞褒語重。茅塞心開。伏念梅才實滯頑心。尤退縮。經箱塵寂。莫逃家丞庶子之譏。藝苑雲蒸。誠駭翰林客卿之對。深恐凋零於冷譜。固嘗論索於陳編。志不能以過人。識不足以廣問。戴盆望日。勤無補於三餘。坐井窺天。智有鄰於五技。衡門感歎。斗室屏營。然而切觀盤盂之書。致戒必謹。韋弦之義。繕性尤深。苟非取則於古經。曷足振名於來世。虛心實腹。學始類於安弦。閑邪存誠。念實同於執玉。反觀典學之成訓。爰探遜志之嘉名。輒布請祈。方虞僭躐。豈驚駘已下。尙希一顧之功。然爰居何知。遽享九奏之禮。寒窗展玩。絢兮虹蜺之章。素壁高張。森然神鬼之護。論深藥石。字重璠璣。已三復而吝消。終九思而感併。此蓋伏遇某官。言爲楷範。道蘊經綸。化閭里之澆風。愍簪纓之弱息。至誠樂易。許傳新著之書。雅量恢弘。不棄一偏之士。遂令少賤。屢獲親承。梅敢不躬勵前聞。仰稱春秋之筆。恪遵明訓。益加歲月之功。永依師門。以堅壯志。

與陳無我論樂府

伏承下教。垂示雅詞。退揆疎蕪。敢居品藻。復緣明命之重。庸誦謏聞之迂。執筆覲慙。通函僣伏。切以陽春

白雪之唱。和者罔希。清廟朱弦之音。知之尤寡。歷觀樂府之傑出。悉爲詞林之緒餘。良由萬物變化之愈多。抑使五采章施之匪易。龍文被寶鼎。雕刻益精。天馬駕鼓車。低徊滋窘。貫珠之音空在。累黍之器莫傳。吐角含商。孰分其清濁。析宮合徵。莫辨其短長。俚歌日煩。古調幾廢。連留桃葉。習晉世之風流。凄切竹枝。傳巴人之騷旅。江南腸斷之句。誰足近之。涼州意外之聲。今無是也。風聲鳥葉。當由動植之可通。霓裳羽衣。徒詫神奇而自眩。捨陽關三疊之清怨。變南鄉九闕之狹邪。樂意生香。寫天機之妙理。山光水色。換俗子之凡容。彼誇刻鵠之工。詎悟承蠅之解。精義無二。至道不煩。靖言思之。孰可繼者。伏惟無我學士。詞華泉湧。言吐冰清。飛星急羽之秋。文傾上幕。投綸沈鉤之暇。興滿南山。每希白石道人。之雅聲。以成黃絹幼婦之佳制。雪兒低唱。未多學士之風高。墨客廣傳。益見咸陽之紙貴。梅尊聞唯謹。快觀尤先。用鹽洗金。殊未明於物理。以蠡測海。徒竊笑其心思。狂斐莫裁。涵容斯幸。

回宗人袁慶遠教授

同源分流。夙感陶公之詠。劬躬瘵後。每懷韓子之碑。均此靈根。褒然望姓。切以經術。基於博士。衣冠盛於司空。名節爲天下高。言非其過。歌詩著先人跡。時與之俱。念鼻祖嘗客於上虞。而耳孫分胙於越土。定居鄞水。占籍開封。西湖之佐蘇公。風流儼在。明招而從太史。文獻有傳。光于淳熙。錮在嘉泰。父子同館。繼廣受之美談。師生竝朝。陋禹宣之異禮。京兆踵河南尹之祖武。成均慕光祿公之家聲。藐焉遺孤。承此玄胃。正備之妬諸杜。鑿地何心。子雲之亡。它揚。沂江有考。車書一致。江海相逢。豈無它人。因以合譜。伏惟教授

學士摘詞展世。敬業守儒。謂鄧林之廣敷。本於一木。探崑崙之無底。散作羣川。田歸於齊。良非得已。爰絕於漢。或曰未然。驗賦形之不齊。審受氏之有自。處就唯謹。繫世是嚴。然而內舉避親。昔者之邊幅。合族戒令。先王之準繩。愧鶩鳩之圖南。憫駢驥之伏櫪。義之別王。述趣乃不同。康樂之愛謝。莊心誠有得。梅偶緣鉛槧。久汗絲綸。傳呼欣大小戴之稱。臭味鄙南北阮之駸。蒨室而得明月。當道而逢夜光。百世不遷。授宗支之非遠。異姓爲後。幸譜牒之可通。敦敘攸同。參承伊始。永懷繾綣。曷罄敷陳。

謝閣學士

東觀英游。久欽諸老。南州俚士。獨守陳編。念相望之迥然。知無因而至爾。何期銓鑒。俾預薦揚。惟清切之司存。實作成於俊乂。王言之制曰。七史官之長有三。風動四方。必訓詞之溫雅。詔垂萬世。在書法之簡嚴。維班馬之良。不能繼獲麟之筆。而燕許之體。難以推倚馬之才。藝不兩能。物無全美。筆則筆削。則削非曲學之可爲。見所見。聞所聞。悉直情而難致。古有斗米而作傳。近多千金以致詞。好惡成一己之私。褒貶失當時之實。掩長卷以竊歎。抱遺經而自娛。故魏收以輕薄寡才。咸稱穢史。王通雖隱淪不仕。獨著元經。方今偉績無前。太平有象。大禮略封禪之記。純誠汰郊丘之儀。聲教萬邦。文質二代。追皇猷創業之永。傳丕基嗣服之初。必屬鴻文。以揚駿德。彰施作繪。極妙巧於羣工。雜比成音。合天和於衆耳。拔犀之選。非易聚毛之長。亦難如梅者。學不逮人。志徒師古。獻漢家三雍之頌。庶或可能。續周書王會之篇。良非所任。揆小材之雕鏤。幸大冶之作成。忘其顛蒙。倍以踊躍。茲蓋伏遇某官。儒林冠冕。文藪準繩。桃李不言。以成衆芳。

之春。松柏後彫而貫四時之氣。官僚慎簡。載籍肇新。爭名於朝。難後來之居上。脩身以道。匪平進以依流。深虞同升之譏。上辱大賢之舉。幸相知於氣味。迄無假於聲容。倘敢不益勵討論。上酬獎拔。求識李邕之面。當已有期。效彈貢禹之冠。不幾於贅。因風輸感。執筆寫情。歲律云更。神休所屆。庸致茵憑之禱。密調鼎鼎之和。

賀鄧善之應奉

茲審講徹。皐比班登。龍尾早居三字。極鉛鉅之光榮。爰作一經。萃縑緗之芳潤。朝端色動。江左文明。切以詞章之體。與政相通。禮樂之宜。隨時斯舉。誠少近古。于以酌今。釋訓警牙。固難返殷周之盛。委心綺靡。殆有鄰齊梁之風。山東之詔令溫然。河西之璽書炳在。往者諸賢不競。故老云亡。掇拾成言。編聯賸語。形模近巧。難逃脫鑿之譏。刻畫傷和。殊近鏤冰之累。徒畫虎以類狗。強令鷺而隨雞。事非偶然。時使之爾。念欲復還其正氣。抑嘗深探於陳編。然而木人石腸。難以語經綸之事。河日海口。要當歸黼黻之才。請誦所聞。無出其右。伏惟某官。清言古瑟。雅製方壺。冶百鍊之金。而成雲雷之奇。合八珍之味。以調薑桂之美。當下帷之多暇。每傾蓋而劇談。意得忘筌。神閒砥筆。船容萬斛。果自致於水中。芝產九莖。宜載歌於殿內。夙嘗相勉。今匪共諛。倚馬才疎。屠龍技謬。歸來之詞莫擬。遂初之賦或尋。話茅舍於玉堂。當塵遠想。謹蔗漿於金盃。冀保天和。傾向之忱。敷陳莫既。

壽鄭潛庵

茲審玉宇金明。蓬壺瑞藹。數環六甲。堯年已合於上元。福擁三千。申旦適同於涪九。江湖相慶。樽俎交歡。伏惟內翰學士。鬱鬱潤松。昂昂野鶴。辨排堅白。共誇麈尾之清言。書喜硬黃。猶習蠅頭之細字。方窮太始之理。以與造物者游。陋絳縣老人之年。讀清溪道士之易。踏龜殼而一笑。持蟹螯以高歌。夢繞故園。壽客相期於晚歲。情親近局。麴生肯負於良辰。傾接維新。扳援實舊。黃絹幼婦之詞。莫擬。子墨客卿之賦。未能。八千歲爲秋。願致長生之祝。六十養於國。佇看優禮之加。薄物助誠。副械瀆聽。

回交代潘檢閱

誦子墨客卿之賦。竊有激昂。聆諸老先生之言。深相推挽。審珠玉之將至。愧糠粃之在前。慶牘未遑。異函先枉。伏惟內翰學士。冰壺貯月。水鑑懸秋。下帷授徒。有矻矻窮年之趣。閉門樂道。無憫憫望歲之憂。追北渚之歎歌。覽東齊之形勝。斧藻樸素。丹青炳靈。相如封禪之書。直譏其陋。賈誼治安之策。允謂可侔。濯纓益振其高風。結綬良非其雅志。金馬門之待詔。有類俳諧。白虎觀之談經。亦幾糅雜。維茲冊府。亶號詞林。寶書如山。汗簡若束。方偃武修文之盛。乃立經陳紀之初。候日影於松階。詞容潤色。瞻天威於芝閣。議許討論。匪慎簡於英髦。曷專美於治世。除書一下。輿論僉諧。梅學匪適。今才不逮古。重以簪纓之舊。猶工鉛槧之勤。泉石寫心。比元郎之漫仕。山川感興。追杜老之壯游。過廬幼婦之辭。重託聞孫之好。有憚其旨。不知所裁。

回冷教授

仰南州之喬木。美蔭獨存。望西山之慶雲。英光猶在。居然傾蓋之幸。辱以投函之謙。斧藻溢情。丹青炳目。切以取士之岐不一。用儒之道實高。賈誼少年。憂國之策尤著。馬周逆旅。入對之疏密諧。法如牛毛。賤若魚目。將望然而引去。寧挽之以必來。方今人文交脩。禮樂備舉。金馬碧雞之頌。可被弦歌。赤麟白雁之祥。宜書竹帛。孰爲稱選。僉謂當仁。伏惟賢良學士。溟海扶搖。清秋沆瀣。圓冠方屨。儼魯國之舒徐。漆簡汗書。補羽陵之疎略。寶氣橫鬱。天葩芬奇。方按軌以徐行。差登途而捷進。青氈舊物。行廣高門。白水同心。益窺雅志。幸雲龍之有應。成針芥之相投。遺以十朋之龜。貴若連城之璧。有味其旨。固難和於大羹。無德以將。敢亟酬於雜佩。銘膺感幸。占對簡蕪。

賀吳編脩

茲審疏青汗簡。錫寵身章。史官之具三長。英髦慎簡。聖經之法五始。盛事特書。荷針芥之偶投。慶雲龍之胥會。編脩內翰。篤志精白。結交老蒼。審黃鐘於希聲。灼知律呂。嗜昌歌之古味。允適酸鹹。維懷寶而深藏。終待價而一試。筆耕云舊。學殖焉窮。梅師友川流。獻文日墜。喜而不寐。類文子之同升。樂以忘憂。慨宜尼於往昔。斐然贊美。蔑以效規。

壽貢仲章

月暈虹蜺。藹南漪之五色。春浮花柳。揆東作之平分。孕彼玉人。瑞茲寶運。伏惟某官。池塘逸興。金石流波。懸弧表四方之心。遠游結駟。落筆擬千古之作。長獻彈冠。愛東方之偷桃。專北門而視草。蓋將旬五日而

後返。抑亦一千歲以來歸。梅善頌莫陳。雅游屢接。沈香亭北。行催芍藥之詞。白玉堂前。愧伴梅花之直。薄儀侑祝。副穎瀆清。

賀鄧善之脩譔

伏審儒林著望。詞苑貪賢。超近署之清班。贊中朝之元化。光膺異數。允際重熙。敢緣肺腑之私。庸寫胸臆之蘊。切以王言之制。始分於唐。人文之精。特盛於宋。故便於宣讀者。必資諧叶。而直以訓告者。當務簡嚴。作者數公。流爲末派。學疎而才勝。每師浩汗。而失於麤疏。記贍而思遲。必慕敷腴。而拙於裁翦。鳧鶴不續。蕭蘭莫分。蓋洗金以鹽。當研物理。而攻玉必石。有假朋從。歷年滋多。此道不競。藏名淵默。莫窮龍虎之變。騰處友善柔。徒欣牛馬之奔走。望風隨其臧否。疾才撫其短長。有符東晉之清談。自謂西都之舊作。昔君實不爲四六語。未嘗失朝廷之尊。而溫伯輒草廿二麻。豈害爲錢穀之吏。必此爲士。其何敢言。然作新斯文。是在吾黨。復古之道。誠惟今茲。起八代之衰。昌黎固專其事。振五季之弊。師魯亦預有功。樂在羣居。道無孤立。伏惟脩譔學士。丰姿凝湛。雅量韜深。大音希聲。儼一獻九奏之意。玄酒不和。成百拜三行之儀。中和養其本根。英華發於情性。譬若夜光明月。衆咸以爲寶珍。方之威鳳祥麟。人莫窺其形狀。陳太丘之容衆。王茂弘之盡懽。以爲黼黻帝猷。曷取竟寧之事。丹青神化。獨追正始之音。梅幼講門功。早親庭誥。探諸老之源委。不知者謂得異書。道前賢之心期。無聞者猶譏曲說。懼廢三槐之緒。聊希五柳之恬。爲可汰之技官。守不求之樸論。要斬傳後。寧望敍遷。欣覩除書。缺脩賀記。幸燈火平生之舊。道江湖相忘之言。人皆

曰賢亦旣遂彈冠之願。老而能學。當益思炳燭之勤。敢效頌規。斯爲處與。

### 回趙太社

伏以豎燎扶朝陽之光。敢居斧藻。贈貂得明月之報。庸謹囊緹。三復先猷。重陳素款。切以屬辭比事。匪遵魯史之舊文。微顯闡幽。允正周王之大統。無傳而著。惟道是明。然而獲麟之箋。有鄰神怪。矢魚之訓。詎止觀陳。紛然賣餅之譏。蕞爾垂旒之喻。泥天正於長曆。循夏五之闕文。郊用辛而非長日之時。禘尊祖而雜圓丘之謬。清言何補。墨守徒矜。投膠澄百尺之渾。引髮舉千鈞之重。首動啖趙。心學邵程。義理精明。賴先儒之啟迪。權衡輕重。資前哲之贊揚。嘗窺西周之簡編。深陋後王之典禮。致太平者。猶有羣議。言五伯者。殆無全人。廢學熙寧。卒致爲戎之歎。尊王慶曆。遂多刻吏之嘲。人物眇然。年運而往。伏惟大尹學士山林圭組。燈火詩書。返袂高歌。法天時於五始。下帷坐授。悟人事於三微。載惟先正。細氈奏對之書。是爲後學。青箱纂輯之式。集狐於腋。端有假於翼成。洗金以鹽。良永慙於癩索。梅困學有志。強仕無功。百年雁塔之聯登。季世龍門之未至。纒胥阜隸。捫心有感於同時。管鮑交朋。掉首未逢於知己。翕然針芥。終以絲蘿。萬二千五百家爲鄉。豈無好學。二百四十餘年行事。聿覩成書。擁籙以陳。袖函非禮。尙祈矜采。俯賜鑒融。

### 回趙太社鄉飲

習鄉上齒。咸推大里之典刑。隆禮尊賢。幸屬貞元之耆舊。矧蟬冕三公之地。在皋比一變之功。人物眇然。年運已往。於粲雙魚之牘。孔昭二馬之期。入學祭典脩。願廣太平之盛觀。升歌主人獻。敢隨後進以同登。



回趙太社

切以百人逐兔。祇益苦心。一朝解牛。敢煩敏手。念洛社久存於鄉約。而杜陵或廢其家聲。宰肉莫均。拔毛不與。仰止金刀之禮樂。陳茲典午之春秋。無以易堯。不如歸趙。粲飛函而禮讓。堅縮袖以勞謙。君子是憂。貪人斯幸。潛魚畏餌。雖自潔於水中。羣蟻慕羶。卒相緣於堂上。其爲計則得矣。獨竊議其可乎。難以立談。終祈臥治。匏五石而無用。其果不能。粟萬鍾以何加。願茲可陋。僉謀懇切。童瀆於融。

壽徐德剛

七月八日

涼生。兔子。瑞應麟兒。玄祖流芳。歲遠猶傳其玉硯。黃姑停宴。夜分端俟於銀津。家聲之克振。可覘宅相之深期。有在桷。陳人愈拙。妙語莫工。望閭里之葱葱。阻舟航而耿耿。九五一曰壽。願益窮皇極之書。四十不動心。矧已開中年之裘。薄儀侑祝。善頌增情。

謝程承旨

爵人於朝。已甘遜避。譽髦斯士。忽被選掄。小己惟驚。大鈞有自。切以王言之制。炳若日星。帝令之行。潤如風雨。三代訓誥。誓命之作。理雖同而體實殊。累聖歲月日時之編。事若近而書貴備。簡嚴足以成信史。清切然後爲口人才。非甚長。藝莫能擅。皇明啟御。文治興圖。漆書汗簡之奇。來者不絕。金泥玉檢之陋。卻而未遑。寬大之詔數頒。遺逸之聘屢舉。宜得鴻碩。以贊雍熙。大鵬乘風。乃鸞鳩之斯集。長鯨失水。願螻螻之所凌。憫涇渭之孰分。慨薰蕕而同置。拾芥而取青紫。彼謂不難。相馬而視玄黃。曷云有遇。炙手可熱。涌氣

如山。能齊言。豈莊嶽之所變。恥與噲伍。何淮陰之過高。惟末俗之實繁。斯南士之不競。雖明有照。渙汗  
華新。鍊金於陶冶之餘。羨海於剛鹵之後。聚毛雖翮。擢象是精。懸水鏡於廟堂。今茲選舉。審銓衡於臺閣。  
夙已簡僚。閭巷駭聞。江湖翹首。桷之不佞。人能具言。性褊介而弗通。學固陋而無補。少承諸老。欲窺龍馬  
之祕圖。晚效一官。深愧蟲魚之曲學。守西樞之遺緒。望北門之後塵。侍坐松階。占對或言。其可教。散襟茅  
宇。倚歌人數。其太迂。雖慙殺青之工。僅免尸素之誚。既云美解。寧敢強留。蒼狗浮雲。幸逃物論。白駒過隙。  
謂失事機。蟻久屈以奚伸。鴻已飛而何慕。私以恤緯之諷。見敢言出綍之舊章。知之非艱。試可乃已。泛觀  
唐世。歷攷宋朝。元白才高。必授題而方拜。歐蘇望重。免給札以卽真。誰謂秦無請從。隗始惟智。行其無事。  
於人何所不容。然而爭進駢肩。一兔詎堪其百逐。旁觀袖手。前禽終失於三驅。彼非招而不來。羌奚爲而  
遽集。議由鷓閑。功在鑿坡。此蓋伏遇某官。間世宗工。先朝元老。文諧律呂。八音振而四懸成。智合耆龜。六  
虛周而三極建。旣任棟梁之重。彌深參朮之儲。謂立賢無方。當視朔南之員幅。凡成人有德。豈拘州里之  
遠遐。夾袋初騰。青氈已復。桷。蒙恩若是。圖報謂何。欲酬國士之知。願假客卿之對。承明三入。莫能書赤驥  
白雁之祥。滄海重游。要飽識紫鳳天吳之異。寸心有在。千穎莫殫。

謝李承旨

五載辭榮。已安初服。一朝出命。遽復舊氈。三已何慙。重來有覩。切以太史編摩之所。翰林清切之司。貴慎  
密而熟於憲章。尙精敏而達於事勢。欲取僑儻絕羣之士。將貽落魄無檢之譏。苟崇依違寡言之人。必致

脂韋不稱之弊。原昔養才於館閣之地。蓋當責效於廊廟之時。文治日興。皇猷淵默。委諸元宰。予以彰衡石之無偏。詢於輿言。足以知芻蕘之可擇。克謹天戒。慎簡乃僚。肩摩足累之徒。揚鞭而避。巖棲穴處之隱。接浙以來。矧聲教久敷於朔南。而忠信可行於蠻貊。拔茅以彙。采葑不遺。有如苦窠之蹤。亦預陶甄之選。茲蓋伏遇某官。精忠貫日。盛德格天。高宗之得傅巖。營求諸野。成湯之於伊尹。學焉後臣。彌窮成性之存。盡著匪躬之蹇蹇。以匡王室。其代予言。惟宮府一體之意深。念君臣同心之會罕。願因知己。庸敢竭愚。難得者非常之機。易失者不次之遇。方今輿地紀載。悉歸于梯航。觀闕會朝。相望其冠蓋。東漸西被。上際下蟠。法過密則煩擾而不安。赦愈多則姦媮之滋幸。理錢穀雖號爲俗吏。當究其出納之源。議禮樂實本於儒生。孰明其沿革之理。同風俗以合志尙。敦朴素以去奇袤。言舉斯心。可運諸掌。然文盛必有武弊。而陽長尤懼陰來。積薪憂燃。非賈誼之過計。前籌借箸。乃張良之遠謀。和羹難壹其酸鹹。成錦易工其萎斐。有懸高鑒。奚假諛言。桷累世詩書。百年簪笏。與銅臭而同傳。敢謂未然。爲瓦注以自怡。不幾於似。當朱門炙手之日。乃清林散髮之秋。著書期身後之名。擊缶遂山中之樂。恩蒙乘傳。非所據以屏營。技止操觚。將何爲而報謝。念承明三入而奚補。望天門九重而莫通。大書特書。執筆難施於青簡。一命再命。循牆深愧於素餐。曷稱獎提。惟肩樸直。玉堂獨掩。恍江南送客之情懷。衡宇載瞻。形稚子候門之夢寐。願安靜退。以盡威藏。

茲審望領儒先。道光王化。宣尼乘桴之意。豈果居夷。幼安度遼而還。殆將易俗。登瀛可俟。橫舟以須。伏惟某官。妙思春雲。壯懷秋水。掣鯨魚而游員嶠。奇觀畢陳。踞龜殼以挹浮丘。妙言合奏。身寄神京之陸海。胸藏東壁之木天。允議居中。詎宜補外。桷屠龍技拙。倚馬才疎。詭御以告王良。則云豈敢。執轡而慕晏子。尙或可能。不腆儀羞。無文敬在。

招俞光遠入塾

七歲入小學。幼儀深著於曲臺。三年通一經。俚諺敢誇於東魯。先猷滋遠。穎識無聞。空多老翁不量力之譏。莫慰大賢願汝爲之意。伏惟教授學士。矻頑妙手。注巧良模。樂矣誨人。陋孫寶之避舍。幡然就道。知李耳之入關。談經排狗曲之嘲。挾策恥兔園之固。以身徇道。初何愧於古先。辭富居貧。益有覩於雅量。尙煩負劍辟咄之訓。以成灑掃應對之儀。虛左以迎。側躬而俟。

